

四庫全書

經部

欽定四庫全書

經部

五禮通考卷二百四

詳校官侍郎臣劉躍雲

給事中<sub>臣</sub>溫常綬覆勘

總校官進士臣繆琪

校對官中書臣李奎

謄錄監生<sub>臣</sub>徐紹城

欽定四庫全書

五禮通考卷二百四

刑部尚書秦蕙田撰

嘉禮七十七

體國經野

書禹貢導岍及岐至于荆山逾于河

錐指傳曰三山皆在雍州河謂梁山龍門西河正義

曰地理志云吳岳在扶風汧縣西古文以為汧山岐

山在襄陽縣西北荆山在馮翊懷德縣南蘇氏曰逾者  
禹自荆山而過於河也孔氏以為荆山之脈逾河而為  
壺口雷首者非是渭案導者循行之謂導山猶云隨山  
蘇氏云自此以下至敷淺原皆隨山之事是也導山時  
尚未施功先儒皆以此為通水曰導山之澗谷而納之  
川殊失經旨汧縣今為鳳陽府之隴州州南三里有汧  
縣故城岍岐荆並在河西渭北禹首導此三山而逾河  
以抵壺口則冀州之所先治者其規畫早定于胸中矣



岍一作汧

說文有汧字而無岍字

汧縣唐為汧源縣隴州治明

省縣入焉周禮雍州山鎮曰嶽山漢志以吳山為雍州  
山是吳山即嶽山也爾雅河南華河西嶽河東岱河北  
恒朱長孺云商周之世疑以岍為西嶽故爾雅職方皆  
名嶽山吳山漢志雖云在縣西而岡巒綿亘延及其  
南與嶽山只是一山自周尊岍山曰嶽山俗又謂之吳  
山或又合稱吳嶽史記遂析嶽山與吳嶽為二山而岍  
山之名遂隱其實此二山者周禮總謂之嶽山禹貢總

謂之岍山當以漢志為正蘇傳引晁氏說又謂今隴山  
天井金門秦嶺皆古之岍山不知何據 漢志美陽縣  
下云禹貢岐山在西北中水鄉周太王所邑詩曰率西  
水滸至於岐下又曰彼徂矣岐有夷之行是水經注  
岐水逕周城南城在岐山之陽而近西所謂居岐之  
陽也非直因山致名亦指水所稱矣又歷周原下北  
則中水鄉成周聚故曰有周也水北即岐山矣今案  
岐山一名天柱山其峰高峻狀若柱然國語周之興

也鶯鶯鳴於岐山故俗呼為鳳凰堆山之南周原在  
焉詩所稱周原膴膴者也東西橫亘肥美寬平在今  
岐山縣東北四十里 荆山有三一在雍域襄德北  
條之荆大禹鑄鼎處也一為荆豫界臨沮南條之荆  
卞和得玉處也一在豫域與禹貢無涉漢郊祀志公  
孫卿曰黃帝采首山銅鑄鼎於荆山下案唐志號州  
湖城縣有覆釜山一名荆山元和志山在縣南即黃  
帝鑄鼎處晉灼以為在馮翊懷德縣非也湖城元省

入閩鄉縣山今在縣南二十五里

縣屬河南府陝州

韓愈詩

云荆山已去華山來日照潼關四扇開李商隱詩云  
楊僕移關三百里可能全是為荆山即此山也蘇傳  
以此為北條之荆因晉灼而誤

壺口雷首至於太岳

錐指傳曰三山在冀州太岳上黨西正義曰地理志  
云壺口在河東北屈縣東南雷首在河東蒲坂縣南  
太岳在河東葭縣東是三山在冀州以太岳東近上

黨故云在上黨西也渭案漢上黨郡今山西潞安府是蒲坂今為平陽府之蒲州其故城在州東南漢縣舜所都也餘見冀州

胡氏渭曰雷首山在今蒲州南一名首陽山詩唐風采芣采芣首陽之顛論語伯夷叔齊餓于首陽之下馬融曰首陽山在蒲坂河曲之中寰宇記云首陽即雷首之南阜也或稱首山漢地理志蒲反有首山祠郊祀志黃帝采首山銅即此亦稱獨頭山闕駟曰首

陽山一名獨頭山夷齊所隱也又名襄山穆天子傳云東巡自河首襄山又名薄山穆天子傳云登薄山寘軫之隘史記封禪書云薄山者襄山也又名堯山漢地理志蒲反有堯山水經注云雷首山臨大河北去蒲坂三十里俗亦謂之堯山也又名中條山元和志云雷首一名中條在河東縣南十五里永樂縣北三十里寰宇記云中條山在芮城縣北十五里亦曰薄山也又名陬山寰宇記云堯山在河東縣南二十

八里即雷首山山有九名亦即陬山湯伐桀升自陬  
注在河曲之南即此也括地志云此山西起雷首東  
至吳坂長數百里隨地異名通典云雷首在今河東  
縣此山凡有八名歷山首陽山薄山襄山甘棗山中  
條山渠豬山獨頭山也蒲州新志首陽山在州南四  
十五里又中條山在州東南十五里山狹而長西起  
雷首迤邐而東直接太行南跨芮城平陸北跨臨晉  
解州安邑夏縣聞喜垣曲諸境凡數百里中條之北

有數峰攢立拱對州城在州南十五里中高旁下俗名為筆架山又南五里為八盤山又南十里為麻谷山又南為鳳凰山去州七十里與潼關相對為中條南麓盡處今據雷首之脈為中條東盡於垣曲王屋在焉禹至此顧不東行而北抵太岳蓋以帝都為急也 太岳即霍山又名霍太山在平陽府霍州東三十里及岳陽縣西北九十里趙城縣東北四十五里周禮冀州山鎮曰霍山漢志河東彘縣有霍太山在



東冀州山是也爾雅西方之美者有霍山之珠玉亦稱景霍晉語宰孔曰景霍以為城韋注云景大也大霍晉山名今在河東堯史記周武王滅殷飛廉先為紂使北方還無所報乃為壇於霍太山而致命焉水經注汾水南過永安縣西故嵐縣也又東與嵐水合水出東北太岳山禹貢所謂岳陽即霍太山矣山有岳廟甚靈汾水又南逕霍城東故霍國也又逕趙城西南穆王以封造父趙氏自此始元和志霍山一名

太岳在霍邑東三十里今州治即霍邑故城也新志云山高百餘丈長八十里周二百餘里南接趙城岳陽北跨靈石今謂之中鎮渭案隋開皇十四年詔以霍山為冀州鎮歷代因之號曰中鎮蓋即古之中岳也降而為鎮為嵩高所壓耳閻百詩曰崧高維嶽謂崧然而高者維是四嶽之山非以太室山為嶽名曰崧高也爾雅撰於三百篇後緣此遂實指嵩高為中嶽太史公又出爾雅後并補注堯典曰中嶽嵩高也

是殆忘却禹貢之太岳矣將堯有二中岳邪漢武登  
禮太室易曰室高中岳名益顯皆為爾雅所誤者或  
曰然則周竟無中嶽乎予曰周仍以唐虞時太岳為  
中岳矣觀職方河內曰冀州鎮曰霍山可知蓋自有  
宇宙便有此山黃帝正名百物蚤已定五嶽之稱禹  
主名山川又從而奠之下迄周秦悉不敢移豈有如  
武帝以衡山遠移南嶽之祀于瀟霍山者乎予最愛  
鄭康成注大司樂四鎮五嶽取諸職方九州之山而

徧足少嫌其以嶽山為西嶽而不以霍山為中嶽又嫌其大宗伯注乃襲爾雅雜以嵩高忘却大司樂注殆由未善讀崧高之詩也哉

蕙田案閻氏以太岳即古之中岳其說甚辨底柱析城至於王屋

雖指傳曰此三山在冀州南河之北東行正義曰地理志云析城在河東潞澤縣西王屋在河東垣縣東北地理志不載底柱底柱在大陽關東析城之西渭

案獲澤今為山西澤州之陽城縣其故城在縣西三十里垣縣今為平陽府絳州之垣曲縣其故城在縣西四十里大陽今為解州之平陸縣其故城在縣東北皆漢縣也大陽關在今河南府陝州東王屋山在今懷慶府濟源縣西北唐王屋縣地西與垣曲接界地理今釋底柱山在今河南河南府陝州東四十里大河中西北去山西平陽府平陸縣五十里析城山在今山西澤州陽城縣西南七十里王屋山在今河

南懷慶府濟源縣西北九十里接山西平陽府垣曲縣及澤州陽城縣界山有三重其狀如屋

太行恒山至於碣石入於海

錐指傳曰此二山連延東北接碣石而入滄海正義曰地理志云太行山在河內山陽縣西北恒山在常山上曲陽縣西北太行去恒山太遠恒山去碣石又遠故云此二山連延東北接碣石而入滄海也渭案山陽今為河南懷慶府之修武縣其故城在縣西北

上曲陽今為直隸真定府定州之曲陽縣其故城在縣西地理志河內櫟王縣西北有太行山山陽縣北有東太行山櫟王今為河內縣其故城即今懷慶府治孔䟽引山陽而遺櫟王非也恒山北岳在今曲陽縣西北碣石見冀州海在碣石之東逾河為禹渡河則入海亦禹涉海也

地理今釋太行山延袤千餘里起於河南懷慶府濟源縣迤而東北跨山西河南直隸界

胡氏渭曰太行列子作太形則行讀如字亦可故陸氏兼存之太行一名五行山淮南子武王欲築宮於五行之山高誘注云太行山也河圖括地象曰太行天下之脊漢志以在壑王者為太行而在山陽者為東太行其太行之支峰乎又案金史地理志云濟源縣有太行山以沁水為界西為王屋東為太行則此山實起於濟源蓋自河南懷慶府入山西澤州迤而東北跨陵川壺關平順潞城黎城武鄉遼州和順平



定樂平以及河南之輝縣武安直隸之井陘獲鹿諸  
州縣界中皆有太行山延袤千餘里馬林少穎曰太  
行在今懷州之北連亘數州為河北脊以接恒岳程  
子謂太行千里片石衆山皆石上起爾朱子語錄曰  
太行山一千里河北諸州皆旋其趾潞州上黨在山  
脊最高處過河便見太行在半天如黑雲然 舜典  
十有一月朔巡狩至於北岳傳云北岳恒山周禮正  
北曰并州其山鎮曰恒山注云在上曲陽爾雅恒山

為北嶽管子曰恒山北臨代南俯趙漢書恒山北岳  
在常山郡上曲陽縣西北有祠并州山張晏曰恒山  
在西避文帝諱故改曰常山 大同府渾源州南二

十里亦有恒山水經注云崞縣南面元嶽即此山也

州本漢雁門郡  
繁峙崞二縣

古北岳恒山歷代史志皆云在上曲

陽並無異論自宋世以恒山沒於遼從曲陽望祀之  
因廢曲陽之恒山而指此為禹迹近志謂與在曲陽  
西北者實一山然州距大茂約三百餘里雖或峰巒

相接未可強合為一也北岳在曲陽又何疑焉閻百  
詩云後之建都于燕者以為曲陽在南渾源少北於  
方位宜余案孔氏詩崧高疏曰若必據所都以定方  
位則五岳之名無代不改何則軒居上谷處恒山之  
西舜居蒲阪在華陰之北豈當據已所在改岳祠乎  
此名儒之言也金世宗大定間或言今既都燕當別  
議五岳名不得仍前代太常卿范洪輒援崧高疏數  
語以對事遂寢明弘治六年兵部尚書馬文升建言

北岳當改祠渾源下禮部議侍郎倪岳持不可乃止  
修渾源州舊廟而祭祀仍在曲陽神宗十六年大同  
巡撫胡來貢疏請改北岳沈文端鯉為宗伯覆疏詳  
駁議者口塞

西傾朱圉鳥鼠至于太華

錐指傳曰西傾朱圉鳥鼠三者雍州之南山至于太  
華相首尾而東正義曰地理志云朱圉在天水冀縣  
南鳥鼠東望太華大遠故傳云相首尾而東也曾氏

曰岍與西傾皆北條山故西傾不言導其文蒙於導  
岍渭案今鞏昌府伏羌縣南有冀縣故城即漢縣也  
西傾鳥鼠太華並見前西傾在鳥鼠之西南鳥鼠渭  
水所出朱圉太華皆在渭水之南

地理今釋朱圉山在今陝西鞏昌府伏羌縣西南三  
十里

熊耳外方桐栢至于陪尾

雖指傳曰四山相連東南在豫州界正義曰地理志

云熊耳山在弘農盧氏縣東嵩高山在潁川密高縣  
古文以為外方桐栢山在南陽平氏縣東南橫尾山  
在江夏安陸縣東北古文以為陪尾是四山接華山  
而相連東南皆在豫州界也朱氏鶴齡曰凡言至于  
者以相去之遠也太華去鳥鼠遠故曰至于則陪尾  
亦應遠觀經文導淮自桐栢東會于泗沂其為徐州  
之陪尾明矣渭案盧氏今屬河南府密高今為登封  
縣地平氏今為南陽府桐栢縣其故城在縣西北四

十里安陸今屬湖廣德安府泗水今屬山東兗州府  
本漢魯國下縣陪尾山在縣東也

地理今釋熊耳山在今河南府盧氏縣西南五十里

接陝西西安府商州

晉上洛縣

界熊耳雖有東西異名其

實一山故郭璞云在上洛班固云在盧氏蔡傳以班

固為非非也外方今中嶽嵩山在河南河南府登封

縣北十里西接洛陽縣北接鞏縣東接開封府密縣

界綿亘一百五十里桐栢山在今河南南陽府桐栢

縣東一里東南接湖廣德安府隨州西接襄陽府襄陽縣界陪尾山在今山東兗州府泗水縣東五十里案孔傳云淮出桐柏經陪尾今德安府安陸縣北有橫山漢志所謂橫尾山古文以為陪尾者也淮水不經此山下吳澄書纂言曰唐志泗水縣有陪尾山泗水出焉蓋此是也以橫尾為陪尾者非是

胡氏渭曰漢書武帝紀元封元年登禮嵩高置奉邑名曰崇高地理志潁川崇高縣武帝置以奉太室山



是為中岳有太室少室山廟古文以室高為外方山也左傳昭四年司馬侯曰四嶽三塗陽城太室太室即嵩高也於四嶽外別言之亦可見嵩高時不為嶽矣爾雅嵩高為中嶽蓋後人所附益耳後漢書喜平五年復室高為嵩高韋昭曰嵩高有太室少室之山山有石室故名戴延之西征記曰東曰太室西曰少室相去十五里嵩高其總名也元和志云嵩高山在告成縣西北二十三里

唐改陽城縣曰告成其故城在今登封縣東南四十里

登封縣北八里高二十里周一百三十里少室山在  
告成縣西北五十里登封縣西十里高六十里周三  
十里渭案古時皆指嵩高為太室而韋昭戴延之則  
兼二室並稱然前賢題咏猶以太室稱嵩山而少室  
則仍其本名故有嵩少之目其山東跨密縣西跨洛  
陽北跨鞏縣綿亘百五十里太室中為峻極峰左右  
列峰各十二凡二十四少室峰三十六先儒皆以嵩  
高為外方金吉甫曰嵩高世名中嶽安得與江夏內

方相為內外哉據唐志陸渾山一名方山蓋古外方  
云此說非是嵩高當禹時未為中嶽即為中嶽而仍  
名外方與東岱西華南衡北恒一例理無可疑且陸  
渾方山亦何以知其為外方乎詩大雅崧高維嶽  
峻極于天兼五嶽言之爾雅釋山曰山大而高崧郭  
璞注云今中嶽嵩高山蓋依此名邢昺疏云李巡曰  
高大曰崧此則山高者自名崧本不指中嶽今之  
中嶽名嵩高或取此文以立名乎無正文故云蓋以

疑之是亦不以詩之崧高為中嶽也自劉熙釋名云  
嵩字或為崧則二字通作一字世遂以降神生甫專  
歸之中嶽文士錯解貽誤至今間有能正之者反以  
為非也

導嶓冢至於荆山

雖指傳曰漾水出嶓冢在梁州經荆山荆山在荊州  
正義曰梁州云岷嶓既藝是嶓冢在梁州也渭案後  
魏地形志華陽郡嶓冢縣有嶓冢山漢水出焉唐六

典山南道名山曰蟠冢蟠冢縣故城在今陝西漢中府沔縣西南四十里西南接寧羌州界山今在州北九十里荆山在今湖廣襄陽府南漳縣西通典云南漳漢臨沮地有荆山也 蟠冢山孔傳不言所在之郡縣而正義引地理志以實之曰隴西郡西縣蟠冢山西漢水所出夫此水即嘉陵水之上源非禹貢之所謂蟠冢道漾東流為漢者也而班固以西縣之蟠冢為禹貢之蟠冢謬矣自是以後言蟠冢者率依班

氏如張衡西京賦云終南太一連岡乎蟠冢潘岳西  
征賦云面終南而背雲陽跨平原而連蟠冢玩其辭  
意皆主隴西而言司馬彪郡國志亦云漢陽郡西縣  
有蟠冢山無異議也自後魏正始中析沔陽地置蟠  
冢縣以表其山而名始著酈道元卒於孝昌二年上  
距正始置縣之時凡二十餘歲本朝典故生所親見  
而注水經不言豈事在成書之後不及追改抑亦因  
其晚出而疑之乎然漾水注引漢中記曰蟠冢以東

水皆東流蟠冢以西水皆西流故俗以蟠冢為分水  
嶺作者亦似知班志之謬而以禹貢蟠冢為當在漢  
中也者不然於漢中記奚為詳及隴西之山邪由此  
觀之則魏收以前已有知蟠冢在漢中者不待地形  
志出而後知也潁達豈未之考乎然班志雖以西縣  
蟠冢為禹貢之山而養水則自繫氐道之下不言出  
某山養與漾通  
或作養自水經云漾水出氐道縣蟠冢山而  
氐道亦有蟠冢矣常璩華陽國志云東源出武都氐

道縣漾山為漾水而氐道之嶓冢且有漾山之目矣  
郭璞注山海經云嶓冢今在武都氐道縣南鄜道元  
注水經云東西兩源俱出嶓冢而同為漢水則似一  
山跨二縣之境而在西縣者為西源在氐道者為東  
源矣輟轉迷惑愈久愈謊說經者不能出其窠臼而  
禹貢之嶓冢幾不可問矣西縣故城在今秦州西南  
氐道今不知所在蓋自晉永嘉之亂隴西沒於氐羌  
郡縣荒廢常璩郭璞皆云氐道屬武都而晉志武都



郡無之則此縣之不可考久矣要之二縣在隴西皆古雍州域也而禹貢嶓冢乃梁州之山不應闌入雍域故唯魏收所言為得其實

秦州之嶓冢與寧羗之嶓冢南北相距五六百里

地理今釋荆山在今湖廣襄陽府南漳縣西少北八十里昭四年左傳荆山九州之險指此

內方至於大別

鍾指傳曰內方大別二山名在荊州漢所經正義曰

地理志云章山在江夏竟陵縣東北古文以為內方山也地理志無大別鄭玄云大別在廬江安豐縣杜預解春秋云大別闕不知何處或曰大別在安豐縣西南左傳云吳既與楚夾漢然後楚乃濟漢而陳自小別至於大別然則二別近漢之名無緣得在安豐如預所言雖不知其處要與內方相接漢水所經必在荊州界也蘇氏曰二別山皆在漢上蔡氏曰內方在今荊門軍長林縣大別在今漢陽軍漢陽縣渭案

地理志六安國安豐縣下云禹貢大別山在西南鄭  
杜說所自出正義謂志無大別何也安豐後漢屬廬  
江郡其故城在今江南廬州府霍丘縣西北竟陵故  
城在今湖廣安陸府鍾祥縣南長林故城在今荊門  
州東漢陽縣即今漢陽府治大別山在其東北水經  
注所謂翼際山也左傳定四年自小別至于大別  
杜預云禹貢漢水至大別南入江然則此二別在江  
夏界水經注云江水東經魯山南古翼際山也元和

志魯山一名大別山

地理今釋內方山在今湖廣安陸府鍾祥縣西周迴百餘里接荆門州界大別山一名魯山在今湖廣漢陽府漢陽縣東北半里漢水西岸

岷山之陽至於衡山

雖指傳曰岷山江所出在梁州正義曰梁州云岷嶓既藝是岷山在梁州也地理志云衡山在長沙湘南縣東南曾氏曰岷嶓皆南條山故岷山不言導其文

蒙於導嶠冢也吳氏曰蜀以西近江源者皆為岷山連峰接岫青城天彭諸山之所環繞皆岷也岷山之陽其山非一衡山南岳也在衡州衡陽縣北七十里南一峰曰岵嶺山自縣西北以至湘南縣東南皆衡山也渭案岷山地理志云在蜀郡湔氐道徼外湔氐道今為四川松潘衛山在衛西北衡山縣本漢湘南縣今屬湖廣衡州府唐志衡山縣有南岳祠元和志云岳廟在縣西三十里衡陽今府治也古今言岷

山者凡四處一在今四川松潘衛衛東南去布政司  
七百六十里史記作汶山封禪書云自華以西名山  
七有瀆山蜀之汶山也漢書地理志云岷山在湔氐  
道西徼外江水所出蜀志秦宓曰蜀有汶阜之山江  
出其腹華陽國志云岷山一名沃焦山其跗曰羊膊  
江水所出任豫益州記云大江泉源始發羊膊嶺下  
東南下百餘里至白馬嶺而歷天彭關水經注云岷  
山在蜀郡氐道縣即瀆山也又謂汶阜山在徼外江

水所導隋志汶山在汶山郡左封縣

唐慈州治東至翼州一百九十里

今疊溪營西有廢翼州

此皆謂在松潘者也一在今成都府之

茂州州本冉駝國漢以其地置汶山郡治汶江縣晉

改曰廣陽隋又改曰汶山山海經注云岷山在廣陽

縣水經注云汶水出汶江道徼外嶠山玉輪坂下元

和志云汶山縣有汶山即岷山去青城山百里天色

清明望見成都即龍山之南首張栻西岳碑云岷山

在茂州列我焉村其跗曰羊膊也輿地廣記云岷山在

汶山縣西北俗謂之鐵豹嶺王氏地理通釋云大渡河一名羊山江源出鐵豹嶺嶺即羊膊之異名也此皆謂在茂州者也一在成都府之灌縣縣本漢縣虎耶江原三縣地周武帝分江原置青城縣因山為名元和志云青城山在蜀州青城縣西北三十二里杜先庭成都記云岷山連峰接岫千里不絕灌縣青城山乃其第一峰也縣志云汶山在縣北三十里蓋即青城矣一在今陝西岷州衛衛本漢隴西郡地西魏



置湓樂縣今衛治即其故城括地志云岷山在岷州  
湓樂縣南連綿至蜀幾二千里皆名岷山元和志云  
山在湓樂縣南一里此皆謂在岷州衛者也然則岷  
山最大志家各就其所在言之陸游曰自蜀郡之西  
大山廣谷豁舒起伏西南走蠻箐中皆岷山也薛季  
宣曰今自岷洮洮松疊以南其大山峻嶺班班可考者  
皆岷山之隨地立名者耳此說是也觀漢志云山在  
徼外則固不可以湓氐一縣限之矣大抵岷山北起

於溢樂實跨古雍州之境而南則訖於青城綿地千餘里與太行伯仲或專指在松潘亦非篤論然大江所出則必直氏道西徼外者也 舜典五月南巡守

至於南岳傳云衡山也後漢志長沙郡湘南縣下云

衡山在東南劉昭曰郭璞云山別名岵嶠湘中記云

遙望衡山如陳雲沿湘千里九向九背迺不復見水

經注云湘水北逕衡山縣東山在西南有三峰一名

紫蓋一名容峰

此處恐有脫誤盛弘之荊州記云衡山有三峰一名紫蓋一名石圉一名

芙蓉峰最為竦傑自遠望之蒼蒼隱天故羅含云望

若陳雲非清霽素朝不見其峰丹水湧其左醴泉流

其右山經謂之岿嶇山為南嶽也山下有舜廟南有

祝融冢衡山東南二面臨映湘川自長沙至此七百

里中有九向九背故漁者歌曰帆隨湘轉望衡九面

山上有飛泉下映青林直注山下望之若幅練矣徐

靈期南岳記云南岳周迴八百里回雁為首嶽麓為

足

嶽麓在長沙故唐志潭州湘潭縣有衡山

長沙記云衡山軒翔聳拔九

千餘丈尊卑差次七十二峰最大者五芙蓉紫蓋石  
廩天柱祝融祝融為最高韓退之曰五岳於中州衡  
山最遠南方之山巍然高而大者以百數獨衡為宗  
顧遷遊衡山記云登祝融之顛俯視四極蒼然一色  
山川雜陳瑣細莫辨風自遠來其力甚勁候與地下  
絕殊比曉觀日出海體象洞見近若疆中東餘游氛  
浩漫無際

過九江至於敷淺原

錐指傳曰敷淺原一名傳陽山在揚州豫章界正義  
曰地理志豫章歷陵縣有傳陽山古文以為敷淺原  
渭案漢志傳易山傳讀曰敷今注疏本作博字之誤  
也晁以道云饒州鄱陽縣界中有歷陵故縣及傳陽  
山其說蓋近是 通典云江州潯陽縣有蒲塘驛即  
漢歷陵縣也驛前有敷淺原原西數十里有敷陽山  
渭案唐武德八年於潯陽縣置蒲塘驛後改為塲五  
代時楊吳升為德安縣今治故驛也杜佑以驛為漢

歷陵縣不知何據豈因王莽改歷陵曰蒲亭而遂以蒲塘附會邪黃子鴻深疑之嘗為之辨曰漢志豫章郡領歷陵縣晉志歷陵與餘汗鄒陽俱割屬鄱陽郡而柴桑則屬武昌郡不應歷陵反出柴桑之西也因謂晁氏云歷陵在鄱陽者為是且曰吳志歷陵有石印山即今饒州府之鄱陽山亦歷陵在鄱陽之一證也今案鄱陽山在府治鄱陽縣西北一百五十里鄱陽湖中亦名石印山鄱陽縣故城在今府城東六十

三里三國吳至隋皆為鄱陽郡治唐移於今所然則  
府城西當即為故歷陵地敷淺原蓋在鄱湖之西落  
星之畔也說文原高平之野人所登原固有山體故  
謂之傳陽山猶彊梁原亦稱華原山杜氏析山與原  
為二處非也朱子九江彭蠡辨曰今之所謂敷淺  
原者為山甚小而庫不足以有所表見而其全體正  
脈遂起而為廬阜則其高且大以盡乎大江彭蠡之  
交而所以識夫衡山東過一丈之所極者唯是乃為

宜耳又答程泰之書曰詳經文敷淺原是衡山東北  
一支盡處意即今廬山若如晁氏說以為江入海處  
所過之水又非特京口而已是其意以廬阜為敷淺  
原也然此山高峻似不可名之曰原金吉甫云敷古  
文作傳傳陽山在廬阜之西南則是敷淺原之陽也  
蓋廬山雖高而其中原田連亘人民莫居所以有敷  
淺原之名是亦善解矣然原田連亘要不過山中高  
平之地耳若此者不一而足安得舉體而名之曰原



王耕野云敷淺原恐非廬山高平曰原而又名敷淺則必平曠之地不為高山可知近朱長孺亦曰傳陽山漢志得之古文可據也朱子疑庠小不足表識繹敷淺之名正不當求之高大蓋傳陽在古本高平之地後人名之為山耳導江漢之山至大別敷淺原而即止者以江漢至此合流赴海不煩殫力隨刊況導水合舉源流可以互見宜必求之山脈盡處邪此說是也今案水經注引孫放廬山賦曰潯陽郡南有廬

山臨彭蠡之澤接平敞之原是廬山下固有平原也

山今跨德化星子二縣之境

南唐改尋陽縣曰德化今為九江府治宋升德

化之星子鎮為縣今為南康府治縣以落星石得名水經注云廬山之南湖中有落星石周迴百餘步高

五丈今在城南五里湖中梁書王僧辯破侯景于落星灣即此地

星子舊以為漢鄡

陽地然鄡陽故城在今鄱陽縣西北一百二十里鄱

湖之東北則都昌為是星子似非其地竊疑星子地

本歷陵而敷淺原即孫放所謂平敞之原乃廬山東

南之麓瀕于彭蠡澤者蓋柴桑故城在德化縣南九

十里故蒲塘驛今為德安縣在德化縣西南一百五十里此必漢柴桑地西連武昌郡界故晉以柴桑屬焉而歷陵與鄒陽俱屬鄱陽郡歷陵在柴桑之東鄒陽之西則唯星子可以當之

歷陵故治當在湖西今星子縣地其境則跨湖

而東宋元嘉初廢歷陵蓋舉石印以東併入鄱陽而其西則併入柴桑故星子鎮屬德化耳

廬山

盤基廣大其陽必有平敞之原但曠衍無奇選勝者所不道而志家又因仍舊說不能詳考指言其狀耳以此求之庶不失朱子之意而又不即以高山為平

原犯學者之所疑準諸地望揆諸經旨視晁氏為少優云

地理今釋敷淺原蔡傳遵用師說指廬阜為敷淺原而復以無可考據為疑何也廬阜在今江西九江府德化縣南山北隸南康府星子縣

蕙田案敷淺原漢志以為豫章歷陵縣之傳陽山水經亦云在歷陵縣西南後世求歷陵者或于德安或於鄱陽皆無定論獨朱子欲

以廬山當敷淺原蔡九峰書傳主德安而兼  
存朱子之說蓋疑而未決胡朏明錐指前後  
亦有兩說然當以後說為長蓋以星子當歷  
陵既與漢志相合而孫放廬山賦亦云臨彭  
蠡之澤接平敞之原則敷淺原實當為匡廬  
之支隴朱子之說本非無據至德安之傳淺  
原出於後人附會而鄱陽則又無山可以當  
之皆不足信

導弱水至於合黎

雖指傳曰合黎水名在流沙東正義曰顧氏云地說書合黎山名但此水出合黎因山為名也鄭玄亦以為山名地理志張掖郡刪丹縣桑欽以為導弱水自此西至酒泉合黎又居延縣有居延澤在東北古文以為流沙如志之言酒泉郡在張掖郡西居延屬張掖合黎在酒泉則流沙在合黎之東與此傳不合案經弱水西流水既至於合黎餘波入於流沙當如傳

文合黎在流沙之東不得在其西也蘇氏曰合黎山  
名易氏曰甘州即漢張掖郡弱水出刪丹縣南山下  
合黎山在張掖縣西北二百里俗名要塗山薛氏曰  
弱水出吐谷渾界窮石山自刪丹西至合黎山與張  
掖河合渭案導亦循行之謂與導河澤之導異禹治  
水或躬親其事或遣官屬往治之及九州功畢其水  
之大而切於利害者有九禹舟行從源至委核其治  
否故謂之導非疏濬決排之謂先儒皆以導為治夫

治河先積石治江先岷山有是理乎經旨鬱而不明  
可數也張掖郡今為甘州衛陝西行都司治酒泉郡  
今為肅州衛刪丹縣即今山丹衛居延故城在甘州  
衛東北塞外其澤曰居延海弱水正流出合黎峽口  
而東北注之非經所謂流沙也

地理今釋合黎山亦名要塗山在今陝西甘州衛西  
北四十里縣延而西接高臺鎮樊二所界

餘波入於流沙



錐指傳曰弱水餘波西溢入流沙顏氏曰流沙在燉煌西林氏曰弱水溢其餘波以被於流沙猶道寺河澤被益豬也薛氏曰流沙大磧也在沙州西八十里其沙隨風流行故名陳氏曰弱水之正者入合黎其餘則入于流沙也金氏曰大抵西北之地多是沙磧史書所謂河沙諸國佛書所謂沙界恒河沙是也沙則水滲而下如沙州以西山北之地即連流沙弱水滲其下也鄭氏曉曰弱水正派至於合黎過此無事疏

鑿矣其餘波入于流沙聽其流行耳志合黎見其經  
流有所歸志流沙見其支流有所洩渭案弱水入流  
沙而謂之餘波蓋時遇衍溢則分泄於流沙不常入  
也其正流自合黎山峽口東北入居延澤故此云餘  
波

地理今釋流沙在今陝西嘉峪關外索科鄂模

即居延澤

漢志古文以壯東至賀蘭山西至廢沙州界幾南北  
千餘里東西數百里其沙隨風流行隨處有之

導黑水至於三危入於南海

錐指林氏曰三危距南海凡數千里禹導黑水至三危即得其故道遂從此以達南海蓋其間數千里不加人功修治故經載此水至於三危即曰入於南海也薛氏曰黑水至沙州燉煌縣經三危山流出徼外書謂南流入海其當時之所見邪夏之西境極於流沙而知黑水之所歸則當時即叙之戎大略為可知也渭案黑水三危並見雍州梁之黑水別是一川非

界雍之西者黑水自三危以北杜氏謂今已堙涸自  
三危以南則水行徼外不可得詳亦莫知其從何處  
入南海也南海自揭陽以西至象林皆是經所謂海  
盡東海也唯黑水所入為南海故言南以別之

地理今釋三危山在大河南今陝西岷州衛塞外古  
疊州西西蕃界中雲南麗江府北河圖括地象云三  
危在鳥鼠西南與汶山相接黑水出其南鄭元云南  
當岷則在積石西南是也

案今雲南大理府雲龍州  
西有三崇山一名三危瀾

滄江經其麓有黑水祠或以為即古三危也然其地太南似未為的姑存備考

導川黑水

即今雲南之瀾滄江其源發於西蕃諾莫渾五巴什

山分支之西曰阿克必拉南流至你那山入雲南界

東岐一支為漾備江

即程大昌所謂葉榆河

東南流分注大理

府之西洱海經流入順寧府境其正支南行絕雲龍

江而東南至雲州

屬順寧府

北之分水嶺仍與漾備江合

又南流至阿瓦國入南海

案金沙瀾滄一為梁州

之黑水一為導川之黑水然皆非四大水之黑水也

昔人謂蕃名山川皆以形色西南夷地水色多黑故  
悉蒙黑名如打沖金沙瀾滄俱得稱黑水也而真黑  
水之源去瀾滄之西三百餘里蕃名哈拉烏蘇色禽  
經蒙蕃怒曩猓猓界由緬甸入南海即佛書所謂黑  
水出阿耨達山即大崑崙山在今達賴喇嘛界東是也禹迹之所不  
至蓋中國在阿耨達之東故名震旦所入大水唯黃  
河一支可見黑水出阿耨達之東實在中國之西南  
未嘗流入內地故從古無人知其源委也 黑水之

辨諸家紛如今考地圖禹貢之黑水有三正不必強

合水經注所謂黑水出張掖雞山

今甘肅

至於燉煌

今廢

沙州此雍州之黑水也漢書地理志犍為郡縣南廣注

云汾關山符黑水所出

南廣今南溪縣

北至犍道入江

今叙州府

唐樊綽亦以麗江為古黑水云羅些城北有三危山

羅些城在今麗江府北境

其水從山南行上出吐蕃界薛李宣謂

瀘水為黑水

今打冲河

引酈道元說黑水亦曰瀘水即若

水出姚州徼外吐蕃界中山海經黑水之間有若水

是也以麗江之說為非不知打沖河至大姚縣即合  
金沙江會流入岷江薛氏之說原與漢志相合此梁  
州之黑水也宋程大昌以瀾滄江為黑水李元陽黑  
水辨亦云隴蜀無入南海之水唯滇之瀾滄足以當  
之而元史載勸農官張立道使交趾並黑水以至其  
國吳任臣山海經注亦以瀾滄為古黑水此導川之  
黑水也蓋雍州之黑水其源在黃河之北梁州及導  
川之黑水其源皆在黃河之南有截然不相紊者第



以張掖燉煌尚在內地可以尋源而求而推其委而  
不得遂託為越河伏流之說夫崑崙為地軸其山根  
連延起頃包河南接秦隴直達長安為南山黑水自  
燉煌而南縱可越大河之伏流其不能越河以南之  
南山也明矣若狃于雍州三危既宅之說此是言雍  
州分域以內今終南鳥鼠皆在河之南而三危更在  
鳥鼠之南

書疏鄭康成引地記云三危在鳥鼠之西  
南當岷山要知禹貢導川之三危必在河

之南非窟三  
苗之三危也

其與雍州之黑水又何涉邪然王瀘水

麗江瀾滄之說者亦皆以意度未能確指水分合不知瀘水麗江源異而流同麗江瀾滄源近而流別分合言之梁州之黑水有兩支而與導河之黑水實出一地也而古未有及之者蓋以二水僻在蕃界隔蔽南山阻奧從古未通中國即魏之法顯唐之玄奘元世祖之南征邱處機之西遊皆繞出崑崙以外歷西域諸國至於滇南總未嘗經其地但從入中國之支流以古今分域配之料約為某水某水而已今海

內一統西南徼外咸入版圖爰遣使臣徧歷其地究  
源討委寫圖以誌支派經絡瞭如指掌諸家浮說有  
折衷矣

李氏紱黑水攷禹貢之水不趨東海者二弱水西行  
而黑水入南海也程氏論黑水三條未能得黑水之  
實其駁隋志扶州黑水是矣扶州黑水既合白水注  
嘉陵江以入岷江與禹貢入南海之文全異自不得  
指為禹貢之黑水也其駁孔氏穎達所引酈氏水經

注則實未審漢四郡之形勢與黃河經行之地孔氏之說雖有可駁而所駁之者未中其竅則孔固失矣而程亦未為得也水經謂黑水出張掖雞山南流至燉煌過三危山南流入於南海程氏謂其說雖出許慎而道元增益以入南海句入南海乃禹貢本文增無害也杜佑誤合於南廣之符黑水則佑自失耳酈不失也孔氏疑黑水不能越黃河而南謂自積石以西河多伏流故得越河入南海程氏詆其巧而駁其

誤謂張掖者甘州而燉煌者沙州甘沙之水皆入積石河河流既東已非南向又河源出于闐南山之北是山岡麓東行南接秦隴直達長安幾近萬里何理可以越之而入南海至河之下流與甘沙對岸為秦河南地其大川為洮洮既北入於河縱有伏流不能逆行南上其說似辯而實非也考漢武所開四郡並在黃河之西惟武威為今涼州與黃河稍近由涼州西北行至甘州去黃河已一千四百餘里又西行四

百餘里為肅州則漢之酒泉也去黃河近二千里由肅州出嘉峪關西北行千三百餘里而後至哈密由哈密西北行八百里而至吐魯番吐魯番西二百餘里為玉門關又西二百餘里為陽關考漢書燉煌郡所屬龍勒縣陽關玉門關在其地杜林以燉煌為古瓜州地生美瓜則舜竄三苗之地所謂與允姓之戎同居瓜州者也瓜州之西為沙州唐書稱沙州燉煌郡黑水所經之三危山在焉今方輿路程圖河源當

西十九度而陽關當西二十六七度之間是黑水所經在河源崑崙西偏千六百里之遠距黃河東北行之道已二三千若洮河在陝西內地則相距六七千里矣蓋黑水在甘州發源時已與黃河下流相遠其流至三危則繞出河源崑崙之西河流已無庸度越況洮水與秦隴諸山又豈能限之也哉至謂甘沙之水並入積石河則甚不然沙州之水距黃河絕遠固無入黃河之理即甘肅之水亦無入黃河者攷古

地圖甘涼之間惟浩亶水由湟水入河今方輿圖所載惟涼州以南有大通河及莊浪河由苦水堡入於黃河而已若涼州以北則皆西北流無入黃河者況甘沙二州之水絕遠者哉古今山川異名固難求其必合然方隅形勢猶可尋也張掖雞山之水漢唐諸史俱無其名以今方輿路程圖攷之甘州惟有一大川名曰黑河發源於馬營墩堡山中西北行四百餘里至古城堡抱甘州城東北歷黑泉諸堡西北行六



百餘里至金塔寺堡出長城外北行四百里至都崑崙河又百餘里入於索科鄂謨鄂謨者池澤之名疑即舊圖所謂蒲昌海者其地在哈密之南瓜州之東甘州之水無大於此者既有黑河之名所歷又以黑泉名堡豈即許慎所謂雞山黑水者耶或疑其水既西北行又入於沙澤無入於南海之跡未敢遽指為禹貢之黑水然三危之山漢書唐書咸以為在燉煌燉煌為古瓜州地三苗所居實生美瓜今瓜之美無

出哈密右者蓋哈密即古瓜州也其西有大鳴沙山至唐武德二年始分為沙州而以燉煌為之屬縣三苗三危既在其地則舍甘州黑河別無所謂禹貢之黑水矣其水雖入於沙澤無南行之跡然甘肅瓜州之地數千里皆沙也地稍低者即滙為澤而水入焉案舊輿圖西番之西大流沙之南湧出一澤名曰嘉河南流為潞江至永昌騰越境內稱為南金沙江由阿瓦緬甸入於南海其水盛大深黑人有稱為黑水

河者以今方輿路程圖考之則嘉湖即今西番大池  
名哈拉努爾色楞格者其水流為大川南行千九百  
里經鄂斯拉達巴罕名黑水江入怒彝境又南行六  
百里入雲南境經怒山之西更名怒江又南行八百  
里經永昌府西境更名潞江又南行三百里至潞江  
安撫司其地當騰越州正東三百餘里皆雲南內地  
土人稱為南金沙江自騰越西南行三百里入阿瓦  
界經緬甸凡千餘里入於南海若以甘州黑河為黑

水之源此黑水江為黑水之委則北起雍州之西北  
南盡梁州之西南其為二州之界可無遺憾而三危  
三苗俱在瓜沙二州更無疑竇若疑甘州黑河既西  
北流其入沙之地當經度之四十一度而嘉湖當三  
十一二度中間相距近二千里入彼出此恐難確定  
然沅水逾河至溢為滎澤又出陶邱北東西相距六  
七百里其水無色可辨神禹尚能定其為沅水所溢  
況黑水與他水不同顏色深黑南北相望禹豈不能


確定其源流乎程氏大昌以葉榆水指為黑水謂榆  
葉漬水而黑固出臆揣數千里大川豈木葉所能黑  
滇池黑水祠去勞廣諸水甚遠考水經葉榆澤在漢  
益州郡葉榆縣經不韋縣入牂牁郡過交趾麋泠縣  
入海自源竟無一字及於黑水似難憑信不韋為  
古哀牢國以今方輿路程圖考之蓋即所謂瀾滄江  
也其水發源西番阿克必拉疑即古之勞水南行千  
六百里始名瀾滄江迤蒙番東境又南行千里入雲

南小甸又南行八百里經永昌府西境則哀牢山在  
焉又南行千六百里經永順威遠二府至車里宣慰  
司名九龍江入阿瓦老撾二國境入於南海其水源  
委甚長似足以當黑水然自發源以至雲南行三千  
餘里並無黑水之名至西洱河來會洱河之源始稱  
黑水其源近出雲南與雍州絕遠中隔岷峨諸山亦  
無與甘州黑水相通之理必非禹貢之黑水程氏乃  
以為足界兩州誤亦甚矣程氏又謂葉榆在蜀正西

東北距宕昌不遠宕昌即三苗種類以為與三危之  
叙三苗相應則其誤尤甚夫三危之在燉煌三苗之  
在瓜州自古訖今別無異說燉煌瓜州在雍州西北  
宕昌在雍州西南相去二千餘里妄指宕昌以為三  
苗又用三苗以影附三危豈有當哉禹貢謂黑水西  
河惟雍州西河者龍門之河以其在冀州之西也然  
西河僅足界雍州東面若以葉榆瀾滄為黑水遠在  
雍州西南境外是雍州西北南三面俱無疆界必不

然矣如以絕無黑水之名之瀾滄江為足以當黑水  
又不如徑指潞江為黑水其源流既與瀾滄相等又  
實有黑水江之名尚略有依據也

右禹貢隨山濬川



五禮通考卷二百四



欽定四庫全書

經部

五禮通考卷二百五

詳校官侍郎臣劉躍雲

給事中臣溫常綬覆勘

總校官進士臣繆 瑛

校對官中書臣李 荃

謄錄監生臣徐紹城

欽定四庫全書

五禮通考卷二百五

刑部尚書秦蕙田撰

嘉禮七十八

體國經野

書禹貢導河積石至于龍門

錐指傳氏曰自積石至于龍門計應三千餘里龍門  
而上積石而下禹功所不加也

南至于華陰

雖指河自龍門南流至華州北而東行易氏曰河自龍門口又二百里至陝州之西北對河為華州華陰縣蔡氏曰華陰華山之北也

東至于底柱

雖指傳曰底柱山名河水分流包山而過山見水中若柱然在西號之界渭案西號今河南府之陝州是也底柱在州東四十里黃河中

又東至于孟津

錐指傳曰孟津地名在洛北都道所湊古今以為津正義  
曰在孟地置津謂之孟津傳云地名謂孟為地名耳杜  
預云孟津河內河陽縣南孟津也在洛陽城北都道所  
湊古今常以為津武王渡之渭案河陽本晉邑漢置縣  
屬河內郡其故城在今河南懷慶府孟縣西南三十里  
東過洛汭至于大伾

錐指傳曰洛汭洛入河處山再成曰伾至於大伾而

北行正義曰洛入河處河南鞏縣東也鄭玄云大伾  
在修武武德之界張揖云成臯縣山也漢書音義有  
臣瓚者以為修武武德無此山也成臯縣山又不一  
成今黎陽縣山臨河豈不是大伾乎瓚言當然程氏  
曰黎陽山在大河垂欲北趨之地經之於河方其自  
南而東當即華陰以記折東之始今其流東已遠垂  
欲折北亦當以地之極東者記之參揣其叙則黎陽  
實為愜當而成臯則為太早也渭案鞏縣漢屬河南

郡其故城在今河南府鞏縣西南三十里修武武德  
漢屬河內郡修武故城在今衛輝府獲嘉縣西北武  
德故城在今懷慶府武陟縣東成臯漢屬河南郡其  
故城在今開封府鄭州汜水縣西北黎陽漢屬魏郡  
其故城在今大名府濬縣東北大伾山在縣東南二  
里

地理今釋大伾山亦名黎山在今直隸大名府濬縣  
東南二里周五里

北過降水至於大陸

錐指傳曰降水水名入河渭案宋張洎云降水即濁漳也字或作絳地理志上黨屯留縣下云桑欽言絳水出西南東入海酈道元引此文作入漳云絳水發源屯留下亂漳津與漳俱得通稱也通典云漳水橫流而入河在今廣平郡肥鄉縣界大陸地名見冀州河渠書云禹道河至於大伾以為河所從來者高水湍悍難以行平地數為敗乃厝二渠以引其河北載

之高地過降水至於大陸二渠其一為漯川自蔡陽  
大伾山南東北流至千乘入海其一則河之經流自  
大伾山西南折而北為宿胥口又東北逕鄴縣東至  
列人斥漳縣界合漳水是為北過降水溝洫志王橫  
曰禹之行河水本隨西山下東北去周譜云定王五  
年河徙則今所行非禹之所穿宜更開空使緣西山  
足乘高地而東北入海即此道也水經所叙漳水自  
平恩以下皆禹河之故道河自斥漳又東北逕平恩



曲周以至鉅鹿其西畔為大陸也漢鉅鹿縣唐為平鄉鉅鹿二縣屬邢州今屬順德府鉅鹿故城即今平鄉縣治

地理今釋降

今本作降

水出今山西潞安府屯留縣西南

八十里盤秀嶺至潞安府潞城縣入濁漳水而濁漳水由是亦名降矣

胡氏渭曰禹河自汲縣東北流入黎陽縣界至大伾山西南折而北為宿胥口蘇代曰決宿胥之口魏無

虛頓丘虛在朝歌界

今濬縣西南有古朝歌城本殷虛

頓丘在黎陽

界

今濬縣西有頓邱故城本衛邑

時河已徙而東宿胥口塞故秦欲

決之以灌二邑水經河水注云自淇口東至遮害亭

亭在濬縣西南五十里

又有宿胥口舊河水北入也淇水注云

淇水東流逕枋城南

在今濬縣西南即淇門渡也

右合宿胥故瀆

瀆受河於頓丘縣遮害亭東黎山西向北會淇水處

立石堰遏水令更東北注魏武開白溝因宿胥故瀆

而加功故蘇代曰決宿胥之口魏無虛頓丘即指是

瀆也淇水又東北逕雍榆城南

在濬縣西南

又東北逕同

山東

在濬縣西南四十五里

又北逕其城東北逕帝嚳冢西

元和志帝嚳陵在澶州頓邱縣北三十里

又北逕白祠山東歷廣陽里逕

顓頊冢西

元和志顓頊陵在頓邱縣西北三十五里

又北逕頓丘縣故城

西

在濬縣西

又東北逕枉人山東牽城西

湯陰縣志云枉人山在縣東南

二十五里與濬縣接界

又東北逕石柱岡

枉人山北連跨巨岡石柱之類也又

東過內黃縣南為白溝也

即漢志清河

今案宋李垂上導

河形勢書請自汲郡東推禹故道出大伾上陽三山

之間復西河故瀆酈道元所謂宿胥故瀆也濬縣舊志故瀆在縣西十里亦曰西河蓋禹迹漢時則流經縣東又縣北四十里有齊村相傳亦黃河故道也然淇水自東過內黃縣南為白溝而向北之河道不可得聞據本注云內黃縣故城右對黃澤即賈讓所見內黃界中有澤方數十里環之有隄者也內黃故城在今縣西北澤大方數十里當接安陽縣界疑此地亦禹河之所經河徙乃鍾為黃澤耳昔殷王河亶甲

居相其子祖乙圮焉而又遷

書序仲丁遷於囂河亶甲居相祖乙圮於耿傳

云相地名在河北祖乙亶甲子圮於相遷於耿河水毀曰圮

通典相州治安陽縣

殷王河亶甲居相即其地元和志相州內黃縣東南

十三里有故殷城河亶甲居相築此則禹河出內黃

安陽之間明矣自此而北則為鄴東之故大河洹水

注云洹水出上黨潞縣南殷墟北竹書紀年曰盤庚

即位自奄遷於此遂曰殷也據書序盤庚所遷之殷

在河南與竹書異孔穎達云盤庚後王或有從河南

亳地遷於洹水之南者非盤庚也今案楚語白公子  
張曰昔殷武丁能聳其德至於神明以入於河自河  
徂亳韋昭云從河內徙都亳也此必盤庚後王有自  
亳遷於奄者又有自奄遷於鄴南之殷者故武丁即  
位時殷都仍在河北尋復徂亳蓋亦圮而遷焉殷本紀曰  
武丁復去亳徙河北即紂都朝歌也武丁自鄴南復遷於亳至武丁則又自亳遷於朝歌淇水注引晉書  
地道記謂武丁遷居沫邑  
蓋誤以武丁為武丁耳禹河行臨漳之東又明矣  
自此東北歷成安至肥鄉而合漳是為北過降水也

漳絳至此并為河矣及河南徙漳絳循河故道而下

故東川復有漳絳之目水經注漳水自斥漳縣南至

銅馬祠東

寰宇記銅馬祠在鉅鹿北七里皆漢鉅鹿縣境也昔殷王祖

乙遷於邢杜佑云即邢州今為順德府蓋亦潞河之

地故其後盤庚又圮而遷於亳殷

又書序祖乙圮於耿

相遷於耿殷本紀云祖乙遷於邢其說不同按耿在

漢河東皮氏縣今為河津縣地傳直以圮為遷未安

從史記較長抑或序圮於耿徙居邢此說是也仲丁河

經世云祖乙踐位圮於耿徙居邢此說是也仲丁河

不遷何用作書其為遷邢而作無疑矣禹河行鉅鹿

之東又明矣以今輿地言之河自濬縣西南折而北

歷內黃

並屬直隸大名府

湯陰安陽臨漳

並屬河南彰德府

魏縣

屬直

隸大名府成安肥鄉曲周

並屬廣平府

平鄉廣宗至鉅鹿縣

並屬

順德府

大陸澤在焉此即禹河北過降水至於大陸之

故道也

又北播為九河

雖指傳曰北分為九河以殺其溢在兗州界渭案徒

駭與冀分水八枝皆在兗域



同為逆河入于海

雖指傳曰同合為一大河名逆河而入于渤海蘇氏  
曰逆河者既分為九又合為一以一迎八而入于海  
即渤海也薛氏曰河入海處舊在平州石城縣東望  
碣石其後大風逆河皆漸于海舊道堙矣渭案石城  
縣唐初析平州盧龍縣地置其故城在今直隸永平  
府灤州南三十里

蕙田案東過洛汭至於大伾北過洛水至於

大陸又北播為九河同為逆河入于海此廿  
九字中盡豫兗冀三州境內河所經行處矣  
洛汭在孟津之東即今鞏縣洛水從南來入  
河處也大伾在今濬縣泴水即清濁二泴水  
肥鄉曲周之境漳水入河處也大陸地名亦  
澤名在今鉅鹿縣河從此東北行即分而為  
九九河在周已無其跡今著書家旁稽博考  
畧得其槩終不能一一實指其地惟北為徒

駭即經流

南為鬲津當不謬耳逆河即九河會

為一河入海處以海潮逆上故名當在今天

津以東久為海水所沒無其地矣禹河初行

之地

此止就孟津以下言之

在當時為冀豫兗三州之

境以今地理言之則洛陽鞏縣原武陽武胙

城皆在河之南濬縣內黃魏縣元城南宮冀

州皆在河之東衡水武邑交河滄州又在河

之南武陟獲嘉新鄉皆在河之北衛輝湯陰

彰德臨漳成安肥鄉曲周鉅鹿新河皆在河  
之西東鹿深州武強獻縣大城青縣天津皆  
在河之北北神禹初平水土大河所行境界  
也

### 附黃河考

### 河源發于崑崙

禹貢曰導河自積石司馬遷云言九州山川尚書  
近之矣今日河源發於崑崙者從其可信者言之

也爾雅河出崑崙虛淮南子崑崙之墟河水出其

東北陬水經注亦曰崑崙墟河水所出自古言河

源者皆推本于崑崙

史記大宛傳漢使窮河源河源出于閼天子按古圖書名

河所出山曰崑崙漢書西南夷傳河兩源一源葱嶺一出于閼鄭樵遂謂河有三源一出葱嶺一出

于閼南山其正源自崑崙又山海經洛書緯及扶南傳皆曰河出崑崙

唐史長慶中

劉元鼎為盟會使言河之上流由洪濟橋

亦曰洪濟城在

陝西西寧衛

西南行千三里水益狹冬春可涉夏秋乃

勝舟其南三百里有三山中高而四下曰紫山直

大羊同國

今在西番  
朵甘衛

古所謂崑崙者也虜曰悶摩

黎山東距長安萬五千里河源其間流澄緩下稍

合衆流水色赤行益遠他水并注則濁河源東北

直莫賀延磧尾

今西番大州  
境有莫賀城

隱測其地蓋劍南之

西元志至元十七年命招討使都實求河源實還

報謂河源出吐蕃朵甘思西鄙有泉百餘泓沮洳

散渙弗可逼視方可七八十里登高望之如列星

然是為星宿海也

番名大  
敦腦免

羣流奔湊連匯二澤

番名

阿刺東流曰赤賓河益引而東凡二三百里羣川

次第流合焉其流浸大遂名黃河然水淺可涉又

東一二百里岐為九渡河通廣五七里又東五百

里水益濁土人抱革囊乘馬以渡自是經兩山峽

間廣可一里二里或半里其深亘測至朶甘思東

北有大雪山

番名亦耳麻不刺  
譯言騰乞里塔

其山最高多積雪

即崑崙也自九度水至崑崙約二十日程崑崙山

麓綿亘五百里河隨山足而東

河源考河水北行  
至崑崙轉西北流

又折而過崑崙北  
乃折而東北流

又東北流千餘里有細黃河自

西南來注之

番名納鄰哈刺

又東北四五百里至貴德州

在西南寧衛

又四百餘里至積石州即禹貢導河之處

矣自發源入中國計六千餘里南北溪澗絡繹灌

注莫知紀極崑崙之西人鮮少山平水漫其東益

高地漸下至積石方林木暢茂世言河九折彼地

有二折焉王氏鏊嘗言天下之山起于崑崙天下

之水亦宜出于崑崙漢張騫歷西域諸國甚久東



漢之世大秦條支安息至于海濱四萬里分重譯  
貢獻甘英嘗窮臨西海而還皆未覩所謂崑崙者  
元使所言何崑崙之近乎恐未可以一人之言廢  
千古之論也夫張騫固已鑿空甘英亦非專使考  
劉元鼎之說參以都實所見河源庶幾可攷又曰  
河源本在西南張騫求之西北所謂差之毫釐謬  
以千里者歟

地理今釋崑崙山在今西蕃界有三山一名阿克

坦齊禽一名巴爾布哈一名巴顏喀拉總名枯爾  
坤譯言崑崙也在積石之西河源所出案漢書地  
理志金城郡臨羌縣西北至塞外有西王母石室  
西有弱水崑崙山祠此蔡傳所據以為崑崙在臨  
羌者也然漢志言西有崑崙山祠非言山在縣界  
漢臨羌縣在今陝西西寧衛西崑崙山不當若是  
之近通典云吐蕃自云崑崙山在國中西南河之  
所出唐書吐蕃傳云劉元鼎使還言自湟水入河

處西南行二千三百里有紫山直大羊同國古所謂崑崙蕃曰悶摩黎山東距長安五千里河源其間蓋即今之枯爾坤也元史河源附錄云吐蕃朵甘思東北有大雪山名亦耳麻不莫刺其山最高譯言騰乞里塔即崑崙也案此即今蕃語所稱阿木你馬勒產母孫大雪山也在星宿海東其山綿亘三百餘里上有九峯最為高大黃河經其南又遶其東北梁寅所謂河遶山之三面如玦然者但

如其言則崑崙轉在河源下流似未為的案地

圖河出今西番巴顏喀拉山東名阿爾坦河東北

流三百餘里合鄂敦塔拉諸泉源

大小千百泓錯列如星元史所

謂呼敦諾爾即星宿海也

滙為查靈鄂靈二海子

各周三三百餘里東西相距

五十餘里元史所謂滙二巨澤名阿喇諾爾也

折而北經蒙古托羅海山

之南轉東南流千餘里南北受數十小水經烏監

莽乃山下有多母打禿昆多倫河多拉昆多倫河

自東南來入之

元史所謂納琳哈刺額爾瑪出二水也

自此折而西

北流三百餘里前後小水奔注不可勝計繞阿木

你馬勒產母孫山之東

即元史所謂崑崙山也

流百五十餘

里有齊普河呼呼烏蘇河自西來入之又迤邐東

北流三百餘里會踏克圖衮俄羅斯諸水歷歸德

堡

元史作貴德州

經積石山至陝西臨洮府河州入中國

界過蘭州又折而東北經寧夏衛流出塞外

河以內為

河套地

又東南至延安府府谷縣入塞

河以東為山西界

南

流至潼關衛又折而東由河南山東界至江南淮

# 安府安東縣入海

胡氏渭曰崑崙國名蓋附近崑崙山者傳記言崑崙凡四處一在西域山海經云崑崙墟在西北河水出其東北隅釋氏西域記謂之阿耨達山水經注云按山海經自崑崙至積石一千七百四十里又引涼土異物志曰葱嶺之水分流東西入大海東為河源禹紀所云崑崙者是也一在海外大荒經云西海之南流砂之濱有大山名曰崑崙其下有弱水之淵環之此山與條支大秦國相近禹本紀云去崑崙五萬里者是也一在酒泉漢志金城臨羌縣西北有西王母石室西有弱水崑崙山祠崔鴻十六國春秋云張駿時酒泉太守馬岌上言酒泉南山即崑崙之體周穆王見西王母樂而忘歸謂此山上石室王母堂珠璣鏤飾煥若神宮禹貢崑崙在臨羌之西即此明矣括地志云

在酒泉縣西南八十里今肅州衛西南崑崙山是也一在吐蕃通典云吐蕃自云崑崙山在國中西南河之所出唐書吐蕃傳云劉元鼎使還言自湟水入河處西南行二千三百里有紫山直大羊同國古所謂崑崙廂曰悶摩黎山東距長安五千里河源其間是也渭按酒泉在雍州之域不可謂西戎西海距玉門陽關四萬餘里而崑崙更在西海之南去積石太遠其非禹貢之崑崙國甚明西域吐蕃未知孰是吐蕃悶摩黎山以劉元鼎言計之東北距大積石不過千餘里浮河甚便然自唐以前未有言崑崙在羌中者何可深信西域之崑崙據山海經云至積石一千七百餘里則浮河亦不難蓋崑崙與析支渠搜皆在雍州之外禹治雍身歷其境三國聞風慕義爭先入貢其過化存神之妙有如此也

蕙田案崑崙國見于禹貢而崑崙山為河源  
見于山海經爾雅淮南子涼王異物志桑欽  
水經若其得之目擊者則唐書吐谷渾傳載  
任城王道宗侯君集次星宿川望積石覽觀  
河源吐蕃傳劉元鼎使還言自湟水入河處  
西南行二千三百里有紫山直大羊同國古  
所謂崑崙虜曰悶摩黎山東距長安五千餘  
里河源其間元史地理志載招討使都實求



河源在土番朶甘思西鄙有泉百餘泓名火  
敦腦兒譯言星宿海東北有大雪山名亦耳  
麻不莫刺譯言騰乞里塔即崑崙也地理今  
釋崑崙山在今西番界有三山一名阿克坦  
齊禽一名巴爾布塔一名巴顏喀拉總名枯  
爾坤譯言崑崙也在積石之西河源所出劉  
元鼎所見悶摩黎山蓋即今之枯爾坤也由  
此觀之則崑崙山當以唐書吐蕃傳為定蓋

在西域之西南明矣夏西戎即唐吐蕃今之  
西番也禹貢崑崙折支渠搜顏氏云崑崙國  
蓋附近崑崙山者崑崙即在雍州之外則劉  
元鼎所云東距長安五千餘里者近是而非  
如山海經水經所云矣案山海經之言崑崙  
也一曰槐江之山邱時之水出焉西南四百  
里曰崑崙之邱又曰海內崑崙之墟在西北  
又曰西海之南流沙之濱赤水之後黑水之

前有大山名曰崑崙墟在西北去嵩高五萬里地之中也蓋山海經多出偽撰止因禹貢有崑崙之名而附以荒誕不經之語水經則又因山海經而附會之與史記禹本紀去嵩高五萬里者皆與大荒經相類乃胡朏明一求其地以實之愚矣

觀承案爾雅河出崑崙墟此言原不謬崑崙析支渠搜本見於禹貢所謂河源於崑崙者

即此崑崙也導河只云自積石者就施功之  
始言之非以為源也西戎在崑崙之域者即  
以山名其國但崑崙甚太綿地甚遠後人窮  
河源而以為是星宿海非崑崙不知仍在崑  
崙之域耳崑崙第統言之星宿則別言之其  
實一也故唐書吐谷渾傳及吐蕃傳劉元鼎  
所言為得其實而元史地理志都實求河源  
亦隱與之合也蓋崑崙即在雍州之外劉元

鼎所云東距長安五千餘里者近是若山海經及史記禹本紀去高高五萬里者皆荒誕不經之論而禹貢雖指更一一求其地以實之亦穿鑿附會之甚已

至積石而入中國

積石山在西寧衛西南百七十里大河經其下即禹迹所陟

胡氏渭曰河自大積石山東北流逕陝西西寧衛

西南塞外至河州西七十里入塞

衛在行都司東南七百餘里黃

河西自塞外流入經衛之東南與河州分水州在臨洮府西一百八十里西至生番界七十里有小積石山兩崖如削河流其中西南去大積石山千餘里

### 又東經河州城北

元志大河自積石州東流循河而行五日至河州

安鄉關

關在州西北百里

是也今大河經州北六十里有

大夏河經州東三十里又北入于河

大夏河或云即灕水至蘭

州境入河

又東北流經蘭州城又東經金縣北

大河自河州東北流至蘭州境其西則湟水合浩  
亶河流入焉其南則洮河流入焉又東北經州城  
境二里金城關在焉為河津之要隘又東北經金  
縣北六十里流入亂山中危湍及澗凡二百餘里  
而入靖虜衛界

又東北經靖遠衛北又東北經寧夏中衛南

大河自金城亂山中而來瀉落平川奔流沟湧烏

蘭橋之險在焉又東北出衛城北一里山峽險隘  
河經其中懸流數仞又東北二百餘里經寧夏中  
衛南十五里地勢稍平而河流益盛矣

又東北經靈州所北又東北經寧夏衛東南

大河自中衛而東幾三百里經靈州所城北其地  
亦謂之河曲蓋河自積石至中衛大抵東北流中  
衛至靈州所正東流由靈州至寧夏則益折而北  
故曰河曲也經寧夏衛東南四十里益引而北入



廢豐州界

又東北入榆林西境出塞經三受降城南又東折而南經榆林之東

大河在榆林衛北千餘里自寧夏衛東北流六百餘里經古豐州之西又北折而東經三受降城南

三城相距凡八百里至廢東勝州西

廢東勝州在山西大同府

西境大河之濱與榆林東故勝州隔河相望正當大河折旋之處

乃折而南其西

則榆林之東境其東則山西大同府朔州之西境

也又南至黃甫川

黃甫川  
榆林東境

近在

西為延安府府谷

縣境東為太原府河曲縣境其間回環曲折幾三

千里古為朔方地今謂河套

又南經府谷縣東又經神木縣南而入葭州境經州  
城東河之東岸為山西河曲縣及保德州暨興縣之  
境

大河在府谷縣城東百步西南流入神木縣境經  
縣南三十里又南經葭州城東一里而山西之河

曲縣北去黃甫川二十餘里

隔河相望也

西南去府谷

百餘里縣濱河為險而保德州西臨大河與府谷

縣隔河相對

府谷在黃河東北岸保德州在黃河西南岸河自黃甫川而下皆迤邐西

南流也

又南百五十里則奇嵐州興縣也縣西去大

河五十里與葭州濱河為界

又南經吳堡縣東又南經綏德州東河之東岸為山

西臨縣及永寧州寧鄉縣之境

大河自葭州而南八十里經吳堡縣城東一里又

南百六十里經綏德州東境

西去州城百二十里

而山西之

臨縣北去大河二十里

與吳堡縣接界

永寧州則西去大

河百十里

志云自州城渡河至綏德州二百五十里

寧鄉縣西去黃河

七十里皆綏德州濱河為境也

又南經青澗縣東又南經延川縣及延長縣東河之東岸為山西石樓縣及永和縣大寧縣之西境

大河在青澗縣東百里無定河自西北流入焉又南經延川縣東四十五里又南經延長縣東三十

餘里而山西之石樓縣西距大河百里永和縣西

距大河五十里

西北接延川縣境

大寧縣西距大河七十

五里

西北接延長縣境

津流相通一輩可航也

又南經宜川縣東河之東岸為山西吉州及寧鄉縣之西境

大河在宜川縣東八十里而山西之吉州西距大

河七十里

與宜川接界

孟門山壺口山皆在其地為河

津險要又南為寧鄉縣西距大河八十里又西南

接韓城縣界緣河兩岸羣山列峙稱險固焉

又南經韓城縣東又南經邵陽縣東河之東岸為山西河津縣及滎河縣臨晉縣之西境

大河在韓城東北八十里龍門山在焉大事記周威烈王十三年晉河岸傾壅龍門至于底柱呂氏

云自春秋以後河患之見于史傳蓋始于此又南

流經梁山東

山在韓城縣南十九里

春秋成五年梁山崩壅

河三日不流即此矣又南經邵陽縣東南四十里

而山西之河津縣即古耿邑也商祖乙都耿圮于  
河水書有盤庚之誥是矣今縣西去大河三十里  
亦有龍門山與韓城之龍門對峙所謂禹鑿龍門  
河經其中者非與又南經滎河縣城西城去大河  
不及一里汾水自西北流入焉又南經臨晉縣西  
三十里渡河而西又三十餘里即邵陽縣也臨晉有吳  
王渡邵陽有茶峪  
渡俱河津濟處  
胡氏渭曰以上禹導河積石至于龍門之所經也

又南經朝邑縣東又南經華陰縣東北而渭水入焉  
河之東岸為蒲州城西又南過雷首山西乃折而東  
也

大河自郃陽縣南百二十里而經朝邑縣東三十  
五里河濱有臨晉關又南五十餘里至華陰縣境  
則華山當其衝潼關在焉

關西去華陰縣四十里

又渭水流

經華陰縣北至縣東北五十里而入于河即禹貢  
導渭入河處也而山西之蒲州大河自臨晉縣境



南流五十餘里經其西門外有蒲津關亦曰臨晉關與朝邑縣臨晉關夾河相對為自古設險之處

又沐水流入焉經雷首山西

山在蒲州原南二十五里

折而東

其地亦謂之河曲春秋時秦晉戰于河曲是也河流自東勝州折而南幾千八百里自壺口龍門以至于潼關兩岸重山翼帶深險而華山復橫亘其南岡巒盤固河於是復折而東河山之勝甲天下矣

胡氏渭曰此河水南至華陰之所經雍州文所稱  
龍門西河者也

又曰穿渠引水非古也自溝洫之制廢而灌溉之  
事興利於田而河則病矣關中引水溉田自鄭國  
渠始及漢武時用鄭當時言穿渠引渭以漕且溉  
南山下用番係言引汾溉皮氏汾陰下引河溉汾  
陰蒲坂下又用嚴熊言引洛溉重泉以東為龍首  
渠宣房既塞用事者益爭言水利朔方西河河西

酒泉皆引河及川谷以溉田關中則有靈輶渠成  
國渠漳渠六輔渠白渠皆溉田各萬餘頃它小渠  
及陂山通道者不可勝言故王莽時大司馬長史  
張戎議曰水性就下行疾則自刮除成空而稍深  
河水重濁號為一石水而六斗泥今西方諸郡以  
至京師東行民皆引河渭山川溉田春夏乾燥少  
水時也故使河流遲貯淤而稍淺雨多水暴至則  
溢決而國家數隄塞之稍益高於平地猶築垣而

居水也可各順從其性毋復灌溉則百川流行水道自利無溢決之害矣蓋河水多泥急則通利緩則淤澱今滎陽之下既有鴻溝華陰以上復有諸渠分水太多則河流日遲河身日高故水暴至不能容漢人知此者鮮唯戎知之

又東經閿鄉縣北又東經靈寶縣北河之北岸為芮城縣南境

大河在閿鄉縣北七里又東經靈寶縣北十里而

山西之芮城縣負山面河南距大河二十里與閿鄉縣夾河相望三十里蓋河自雷首西麓而南經芮城西二十里稍南即折而東芮城當其曲折之間而閿鄉縣亦為大河東折之衝東至靈寶縣七十餘里西距潼關六十里踞高臨深為險塞

又東經陝州城北又東經澠池縣及新安縣北河之北岸為平陸及垣曲縣境

大河在陝州城北自靈寶縣東流六十里至州城

西北三里大陽津在焉

亦曰茅津

河津要地也又東四

十餘里為底柱山控扼中流波濤怒湍舟船經此

稱為艱阻又東百餘里經澠池縣北境

大河南去縣城六十

餘里又東百里為新安縣境

大河南去縣城四十餘里

陵阪陂陀

津途遙隔故二邑無濱河之稱也而山西之平陸

縣城去大河東南距陝州不過五十六里南北往

來常為津徑又東二百餘里至垣曲縣南二十里

岡阜逶迤與河南岸兩相倚阻皆利涉之所也

胡氏渭曰以上河水東至底柱之所經也

又東經河南府北河之北岸為濟源縣南境

大河在河南府城北二十里繞北邙山之麓

北邙山在

府城北二十里

層巒疊阜屹然保障志云大河自芮城閿

鄉縣而東河之北岸則中條以接王屋南岸則嶠

函以接北邙夾河翼帶並趨而東雖底柱扼塞中

流而旁無潰決之患則以岡陵包絡有自然之險

固耳而濟源縣南距大河七十里西鄰垣曲南衛

洛陽唐史聖歷二年河溢湮濟源民舍千餘家或  
以為山水暴發非河患也

又東經孟津縣北河之北岸為孟縣南境

大河在孟津縣北五里北岸至孟縣三十里

今孟縣西

南至孟津縣五十餘里蓋嘉靖中孟津益徙而西也即古之孟津也河橋在

焉河陽三城置于此宋史乾德二年孟州水漲壞

中渾橋金史大定十一年河決王村南京孟衛州

界多被其害

王村今山東濮州治也孟州即今孟縣南京即今開封府蓋下流壅故倒



灌也明嘉靖十七年河漲孟津縣圯于水蓋河自

孟津而上多循山麓行至孟津兩岸平濶河勢漸  
張潰溢之患于是乎見端矣夫決在下流河之患  
猶淺決在上流河之患乃深孟津河行平陸之上  
流也河患及此下流之壅闕必日甚橫決必且益  
多矣

胡氏渭曰以上河水又東至孟津之所經也

又東經鞏縣北洛水入焉河之北岸為溫縣之境濟

水入焉

大河在鞏縣北十里

西去孟津縣八十里

洛水自西南流入

焉又東經溫縣南二十里濟水入焉

導川里道紀自鞏縣東北

至溫凡四十里

宋太平興國二年河決孟州之溫縣蓋河

既出險就平復南納洛川之注北并濟水之流縱

橫震盪勢不能已疏道無方鞏洛而下禹貢舊迹

安得不月異而歲不同哉

又東經汜水縣北又東經滎陽縣北河之北岸為武

涉縣之南境

大河在汜水縣北一里

里道紀渡河西北至溫縣二十五里又東經

滎陽縣北二十五里洪武十五年河決滎陽命修

塞之正統十三年河復決滎陽經曹濮衝張秋在

山

東東潰沙灣東堤

沙灣在山東壽張縣

奪濟汶入海尋自開

封西南經陳留自毫入渦河又經蒙城至懷遠縣

入淮

陳留縣屬河南開封府亳州蒙城縣懷遠縣俱屬鳳陽府

而開封城遂在

河北久之始復故道而武涉南去大河五十里西

南與滎陽縣接境沁水自北來至縣南入于大河

沁水入河之處舊名黃口今曰南賈口

宋熙寧十年河溢懷州黃沁

口即其地也

又東經河陰縣北又東經滎澤縣北河之北岸為獲

嘉縣之南境

大河在河陰縣北十五里

里道記自河陰縣渡河至武涉縣五十六里

縣西二十里有石門即古之滎口秦始皇二十三

年攻魏引河溝灌大梁漢王橫言秦攻魏決河灌

其都決處遂大不可復補即此也後漢初河自滎

陽決入汴

河陰故滎陽地

永平十三年詔修汴渠隄自滎

陽東至千乘海口千餘里蓋始功于此自河陰而

東三十里經滎澤縣北五里滎澤地稍下古滎水

所鍾也唐開成三年河決浸鄭州外城五代漢

乾祐三年河決鄭州周廣順二年河復決于鄭州

說者曰自滎澤縣決而南也

五代史云河決原顯武或曰當古滎澤

德初遣使修塞決河

又五代史周廣順中河決河陰

宋太平興國

二年河決于滎澤熙寧十年河復決滎澤元延祐

十年河決滎澤之塔海莊東堤

塔海莊在縣東南七里

久之

始塞明正統十三年河決滎陽既而自孫家渡決

而南

孫家渡在縣東南五十里

河南徙久之始塞弘治五年河

大決于封邱撫臣徐恪請開孫家渡從之既而復

塞

河渠考先是弘治二年河決原武命戶部侍郎白昂治之昂于滎澤縣楊橋開支渠引中牟尉

氏決河由陳穎至壽州達淮楊橋在縣東南與孫家渡相近蓋引決河使入正統時南決舊道也至是河流橫潰張秋決口塞而復決恪上言決河湍悍之勢未可遽回今自滎澤孫家渡口舊河東經

朱仙鎮下至項城南順猶有涓涓之流若疏之由  
泗入淮可殺上流之勢又黃陵岡有賈魯舊河南  
經曹縣梁靖口下通歸德卞家道口今梁靖以北  
淤塞將平計功力之施八十餘里若疏而濬之使  
由徐入淮以殺下流之勢則決口而衛輝府之獲  
可塞運道可完也時多從其策

嘉縣南去大河六十里與滎澤河陰接壤宋太平  
興國三年河決懷州之獲嘉蓋亦隄防之處矣

又東經原武縣北陽武縣南

大河在原武縣北二十里五代周廣順中河決原  
武尋遣使修塞又顯德六年鄭州奏河決原武宋

元豐元年河復決於此五年又決下流納梁山灤

梁山灤在山東壽張縣宋志河決原武埽溢入利  
津河陽武溝刁馬河歸納梁山灤利津等河皆在

陽武明洪武十四年河決原武及祥符中牟二十

四年河決原武黑陽山在縣北二十里東經開封城北五

里又南行至項城經潁州潁上縣東至壽州正陽

鎮正陽鎮在壽州西六十里全入于淮而河之故道淤塞疏久

之乃復舊弘治三年河復決原武支流為三一決

封邱金龍口亦作荆隆口漫祥符及長垣北直長垣縣下曹



濮衝張秋長隄一出中牟下尉氏一汜濫于蘭陽

儀封考城歸德入宿州詔白昂修塞之河渠考昂為戶部侍郎奉命治河築陽武長堤以防張秋之決引中牟

決河出滎澤陽橋下達于淮濬宿州古下河達泗

州又濬睢河自歸德飲馬池中經符離橋至宿遷縣入漕河上築長隄下修減水閘又疏月河十餘

以殺其勢塞決口三十六由河入汴汴入睢非泗泗入淮淮達海水患少息昂又以河南入淮非

正道恐不能容乃復自魚臺歷德州至吳橋修古河隄又自東平北至興濟鑿小河十二道引水入

清河及古黃河入海河口各作石堰以時啓閉昂意蓋欲于東北分其流于南東疏其淤也未幾河

復決徙昂所規畫一時皆廢而陽武南距大河十  
吳橋興濟今直隸屬縣也

餘里舊時大河經城北與衛輝府之新鄉汲縣接

境自決塞不時河遂徙而南周廣順二年河決陽

武尋修塞之

時又決常樂驛或曰驛在陽武西

宋乾德三年河決

陽武開寶五年復決陽武金大定十年河決陽武

之白溝

白溝在縣東南三里

明昌五年河決陽武故堤

決口地名

光祿村灌封邱而東元至元二十五年陽武諸處河

決泰定三年河決陽武漂居民萬六千五百餘家

尋復塞治明洪武一十五年河決陽武天啟元年

河決陽武縣脾沙岡

在縣東南二十里

由封邱曹單至考

城復入舊河自河出陽武之南而新鄉汲縣胙城之境皆去河漸遠禹迹之益不可問也自陽武之決塞始也

大河舊道在陽武縣北又東經延津縣北又東經胙城縣北河之北岸為新鄉縣及汲縣之境

此大河舊道也舊志云河在陽武縣北二十三里河之北岸為新鄉縣境縣南去大河三十里明昌

中河決陽武入封邱于是河益東南下

金史貞祐四年延州

刺史溫薩可喜言近世河離故道自衛東南流由徐邳入海以此河南之地為狄臣竊見新鄉縣西河

水可決使東北流其南有舊堤水不能溢行五十餘里與清河合則由濬州大名觀州清河柳口入

海此河之舊道也皆有古堤補其罅漏足矣如此則山東大名等路皆在河南而河北諸郡亦得其

半退足以為備禦之計進足以杜恢復之圖議者以河流東南已久決之非計遂寢清河謂水口柳

口即今古直河也

元至元九年河決新鄉

元史云河決新鄉廣盈倉南河

北蓋是時河猶出陽武新鄉間也由陽武而東二

十里逕延津城北十七里延津古酸棗也漢文帝

後元年河決酸棗東潰金隄東郡大興卒塞之五代周廣順二年河決酸棗顯德初遣使修塞明成化一十四年河溢延津明年復自縣南流入封邱其舊流則自延津折而東北經汲縣東南十七里又北逕胙城縣北一里

里道記延津縣東北至縣城四十五里

宋熙

寧四年河溢衛州王供埽

舊志云在州東三十里

十年復溢

王供埽及汲縣上下埽金大定一年河決衛州及延津縣瀰漫至歸德府二十六年河決衛州堤壞

其城泛濫及于大名先是胙城隸開封府泰和八年以限大河改屬衛州貞祐三年徙州治于宜封新城以胙城為倚郭胙城為河北縣自金始也

又東北經濬縣之南滑縣之北

大河舊在濬縣城南一里河之南岸即滑縣界里

記滑縣西北至濬縣四十里濬縣南至胙城縣五十里大河經其間北曰黎

陽津南曰白馬津自晉津濟之要今變為平陸矣

漢建始四年河決東郡金隄顏氏曰在唐元和八

年河溢瓠子東泛滑距城十二里鄭滑帥薛平魏

博帥田宏正共發卒鑿黎陽山東復入故瀆

故瀆在黎

陽西南時河流南徙薛平請于田宏正共發卒鑿古河十四里逕黎陽山東會于故瀆自是滑無水

患

開成三年河決浸滑州外城乾寧三年河漲將

毀滑州朱全忠決為二河夾城而東為害滋甚石

晉天福五年滑州河決九年滑州河決侵汴曹單

濮鄆五州之境環梁山合于汶大發數道丁夫塞

之五代漢乾祐元年河決滑州之魚池店

在州西

廣順一年河決滑州靈河諸處

靈河廢縣在今滑縣東南六十里五

代史廣順中河決靈河魚池六明鎮諸處蓋皆在今滑縣境內

命王浚修塞之三

年義成帥白重贊奏塞決河宋乾德四年滑州河

決壞靈河大堤太平興國三年河又決滑州之靈

河八年大河決滑州之韓村

在州東北

泛澶濮曹濟東

南流至彭城入於淮九年河復決滑州之房利

亦在州東

北既而巡河官梁審言滑州土脈疏岸善隕每歲河決南岸害民田請于迎陽埽鑿渠引水凡四十里至黎陽合河以防暴漲從之既而渠成又命鑿河開渠自韓村埽至州西鐵狗廟五十餘里復合



于河以分水勢迎陽  
在州東北大河北岸

大中祥符四年河決通利軍

今濬縣

合御河壞州城田廬

州城即濬州城

天禧三年滑州

河溢城西北天臺旁俄復潰于城西南岸漫溢州

城歷澶濮曹鄆注梁山泊又合清水古汴渠

此清水謂

泗水也

東入于淮州邑罹患者十二三詔發丁夫塞

治四年河復決于天臺山天聖五年塞河成以其

近天臺山麓名曰天臺埽自是以後滑州之患大

抵移于澶州矣

元和三年河復決于蘇村在濬縣東北然其為害甚鮮重和初詔于

滑州濬州界萬年堤廣植林木以護堤岸以壯地勢河自大伾以上猶禹貢

時大河經流也

大伾山在濬縣東二里

漢賈讓欲決黎陽遮

害亭

亭在濬縣西南五十里

放河使北入海西薄大山東薄

金堤勢不能遠泛濫此即司馬遷河渠書所稱禹  
以為河所從來者高水湍悍難以行平地數為敗  
乃醜二渠以引其河北載之高地之說也其後王  
橫亦言禹行河水本隨西山下東北去宜更開空  
使緣西山足乘高地而東北入海迺無水灾宋李

垂祖其說欲引河自大伾而北載之高地其後孫  
民先亦主是說元豐中陳祐甫亦請修復禹故道  
夫滑州河患莫甚于宋之天禧以前於此時引河  
去北未為不可其後河亦益徙而北出于信都勃  
海間故道庶幾可復矣乃謀國者方且人持一說  
非迂踈拂逆之計則因循苟且之見而已矣

胡氏渭曰以上河水東過洛汭至于大伾之所經  
也

又曰凡二水並行一盛則一微自然之勢也宋元祐初蘇轍上疏有云黃河之性急則通流緩則淤澱既無東西皆急之勢安有兩河並行之理此格言也蓋上流宜合而不宜分合則流急而沙去分則流緩而沙停而禹顧於大伾之南醴為漯川者則以河勢欲東不得不分之以泄其怒以漯川一道分河流十之一二不使指大如股亦未為害耳及周之衰王政不修水官失職諸侯各擅其山川

以為已利於是滎陽下引河為鴻溝者自是以後  
日漸穿通枝津交絡宋鄭陳蔡曹衛之郊無所不  
達至定王五年河遂南徙無他河水之入鴻溝者  
多則經流遲貯不能衝刷泥沙故也宿胥之塞寔  
鴻溝致之不然禹功歷千歲而不敝何獨至春秋  
一旦變遷也哉

又東北經開州南長垣縣及東明縣之北

大河舊在開州城南漢之滎陽宋之澶州皆其地

也漢元光三年河水徙從頓丘東南流既而決瓠

子

在今州西南二十五里

東南注鉅野

鉅野澤在山東鉅野縣

通于淮

泗

此為黃河入淮之始邱氏以宋熙寧十年為黃河入淮之始誤也

上使汲黯鄭

當時興人徒塞之輒復壞元封二年自臨決河塞

之作瓠子之歌是也五代周廣順三年澶州河溢

宋乾德三年河決澶州開寶四年河復決澶州東

滙于鄆濮壞民田舍五年河復決濮陽命潁州團

練使曹輪往塞之淳化四年河復決澶州陷北城

壞廬舍七千餘區景德元年河決澶州橫隴埽在州

東自是遂為故道所謂橫隴河也四年又壞澶州五八埽在州西南大

中祥符七年河決澶州大吳埽在州東天聖六年又

決州之王楚埽在州西南景祐元年復決于橫隴埽慶

歷八年又決州之商胡埽在州東北三十里自是遂為故道所謂商胡河

也宋志商胡決河自魏北至恩冀乾寧入海為嘉北流其二股河自魏恩東至德滄入海為東流

祐元年河復決于六塔河六塔河在州東北十七里自商胡東南通橫隴

河之渠也先自皇祐二年河決館陶縣之郭固四年塞郭固而河勢猶盛議者請于澶州開六塔河以

披其勢于是遣使相度詣銅城鎮海口以約古道  
高下之勢歐陽修以塞商胡開橫隴回大河于故  
道計一千餘里役鉅費煩連宜停罷李仲昌等固  
謂開六塔河使歸橫隴時橫隴湮塞已二十年商  
胡復決數歲矣賈昌朝等又欲移決河于京東故  
道歐陽修曰六塔止是別河下流已為濱棣德博  
諸州患若全回大河其害必甚故道不可復不待  
智者而知也至是遂塞商胡北流入六塔河河不  
能容是夕遂決河北被患者  
數千里銅城鎮在濱州海口

熙寧四年河溢澶

州之曹村

在州西南

十年大決于曹村澶淵北流斷絕

河道南徙東匯于梁山張澤灤

梁山灤見前張澤灤或曰即今山東

汶上縣之南旺湖

分為二派一合南清河入淮一合北清



河入海

北南清河今泗水也清河大清河也

灌郡縣四十五濮濟鄆

徐更甚元豐元年決口塞改曹邱埽曰靈平築堤

斷河流復歸北三年澶州孫村陳埽及大吳小吳

埽復決

孫村等埽俱在州東

四年小吳埽復大決自澶注入

御河恩州危甚五年河溢內黃決大吳埽以紓靈

平水患

放之使北也

蓋自河入御河之後而宋澶州之

患稍緩至金大定以後河益徙而南澶州之流遂

絕明正統十三年河決滎陽自陽武衝入故道直

至州治南又東抵濮州壞張秋隄入海後復塞治  
蓋瓠子靈平之舊迹皆不可復識矣

開州之東北為清豐縣之西內黃縣之東

大河舊道在內黃縣東南及清豐縣西南

水經注大河故

潰東北逕戚城西又經繁陽故城東陰安故城西是也戚城在開州繁陽在內黃陰安在清豐縣

漢時河皆經此元光三年河徙從頓邱東南流

頓邱

今清豐縣境是也

後決塞不時故道廢宋時澶州河屢決

河復行北道開寶八年河決澶州之頓邱太平興

國二年河復決于頓邱元祐八年河溢內黃埽元  
符二年河決內黃口灌邢洺諸州而東道之流遂  
絕

又東北經南樂縣及大名縣元城縣之東

水經注大河故瀆經昌樂故城東即南樂也宋時  
大河亦逕此嘉祐五年韓貺請分浚二股五股諸  
河于縣境以減下流恩冀之患治平元年始命都  
水監浚治熙寧初河自恩冀北注議者請開二股

河漸閉北流三年張鞏等奏大河東徙北流淺小  
請閉北流從之未幾河自其南四十里許家港東  
北汎濫大名恩德滄永靜五州軍境詔遣官相度  
六年王安石奏自大名之東南開修直河狹大河  
還二股故道於是河勢增漲十年河遂大決于澶  
州此即宋人回河之誤也而大名元城縣亦皆大河所經也  
唐開元十四年魏州河溢宋嘉祐七年河決大名  
第五埽元豐七年河溢元城埽決橫堤冀洺北京

皆被其害八年河決大名之小張口宋時以大名為北京隄防障遏無歲不講也

又東經館陶縣西又北經臨清州及高唐州之境又北經清河縣南

大河故道自元城冠縣間入館陶界

冠縣館陶俱山東屬縣

漢溝洫志自塞宣房

即鉅子河在開州

後河復北決于館

陶分為屯氏河東北經魏郡清河信都勃海入海

廣深與大河等因其自然不限塞也

屯氏河在元館陶縣

帝永光五年河決清河靈鳴犢口而屯氏河絕廢靈

縣鳴犢口今在直隸清河縣

成帝建始二年河復決于館陶

所決

之河亦名屯氏別河及東郡金隄泛濫兗豫入平原千乘濟

南凡灌四郡三十二縣又鴻嘉四年勃海信都河

水溢溢灌縣邑三十一新莽始建國三年河決魏

郡泛清河以東數郡

漢所稱魏郡大約主館陶以北言之漢書先是莽恐河決

為元城冢墓害及決東去元城不憂水灾故遂不限塞

水經注大河故瀆經

甘陵故城南

甘陵亦在清河縣

又東北經靈縣故城南

今廢

靈縣在博平縣境似不在甘陵東北也

河瀆于縣別出為鳴犢河又

東逕鄒縣故城東

鄒縣今高唐州夏津縣也漢志云鄒居河北即此

此即

漢時河所出之道宋皇祐二年河決館陶縣之郭

固在縣東北四年塞之

即宋史所稱郭固塞而河勢熙猶盛議者請開澶州六塔河熙

寧四年北京新隄第四第五埽決漂溺館陶永濟

清陽以北

永濟廢縣在今臨清州西仁宗皇祐元年河合永濟渠注乾寧軍縣以永濟渠

而名也清陽廢縣亦在清河縣

下屬恩冀合于御河五年河溢于

夏津而清河即宋之恩州也熙寧元年河溢恩州

烏欄堤

在州東

是年又決冀州棗強埽北注瀛州既

又溢瀛州樂壽埽元祐四年又溢冀州南宮等五  
埽時都水監言前二年河決南宮下埽三年決上  
埽今四年決宗城中埽蓋皆自恩州決而北也政  
和二年河決冀州棗強埽都水孟揆言棗強東堤  
決溢其漫水行流多鹹鹵及積水之地不犯州軍  
止經數縣地分迤邐接御河歸納黃河今欲自決  
口上恩州之地水堤為始增補舊堤接續御河東



岸簽合大河從之宣和三年河決恩州清河瑞蓋  
自內黃決後河出清河之北至此下流漸壅故上  
流復決河又從瀛冀而西南矣

又東經德州西又東北經景州及滄州之境入于海  
德州漢平原郡界也河之故道本在平原以北漢  
以前大槩從魏郡清河信都勃海界入海皆與平  
原接境不徑至平原也武帝建元三年河水溢于  
平原成帝建始三年河決館陶遂溢入平原千乘

濟南界中河平三年河復決平原流入濟南千乘  
復堤塞之東漢永平中河流合汴泛濫兗豫明帝  
使王景治之絕水立門河汴分流自滎陽東至千  
乘海口千餘里十里立一水門令更相回注無復  
潰漏之患然則河經平原以南自漢建始中始而  
永平以後嘗為河之經流矣後漢以及南北朝時  
大河決塞史多失于  
記水經注大河故瀆逕平原故城西又北逕修縣

故城東

修縣在今  
直隸景州

又東北至東光縣故城西

東光  
今直

隸屬縣

而合于漳水此亦約言西漢時大河所經之處也元時河仍自千乘入海不至東光合漳也宋自熙寧以後主回河之說滄景常多水患元豐四年河溢滄州南皮上下埽又溢清池又溢永靜軍阜城下埽既而河流益北大抵合御河西山諸水自深州武強瀛州樂壽埽至清州獨流砦三叉口而入于海

開州之東為觀城縣及朝城縣南河之南岸濮州之

北

水經注大河逕衛國縣南

衛國縣即今觀城縣

鄆城縣北城鄆

舊縣濮州治也

疑東漢以後大河故道即出於此五代晉

開運三年河決澶州臨黃漢天福十二年河決觀

城界楚里村堤

在縣西南

東北經臨黃觀城二縣

臨黃廢縣

今在觀城縣

宋開寶五年河決濮陽

濮陽即今濮州

明道二年

移朝城縣于社婆村

移而北也

避河患也明正統十三

年河決滎陽衝曹濮宏治三年河復決原武衝曹

濮濮州蓋舊道所經常為東下之衝矣

又東經范縣北莘縣及聊城縣之南

大河故道在范縣之北倉亭津在焉

津在今濮縣東北舊經

云自范縣渡河而北六十里即莘縣是也而聊城故博州治今東昌府治焉開元十年博州河決五代晉天福四年河決博州即此也

又東經東阿縣北博平縣及茌平縣南

東阿自昔大河之衝也南漲則渰東平東溢則浸

濟南五代梁末唐遣李嗣源取鄆州守楊劉

今在東阿

縣梁人攻楊劉決河口以限晉兵決口益大連年

為曹濮患同光二年命婁繼英督汴滑兵塞之未

幾復壞晉天福二年河決鄆州

自東阿決而南

開運三年

河決楊劉西入莘縣廣四十里自朝城北流

自東阿決

而西也周顯德初命宰相李穀治隄自陽穀抵張秋

口遏塞之宋乾德二年河決鄆州之竹村

在州西北

三

年鄆州河決太平興國七年河漲凌鄆州城將陷

咸平三年河決鄆州王陵埽

在州西

浮鉅野入淮泗

水勢悍激侵迫州城明道二年廢鄆州土橋渡以

避水

渡在州東是時河流漲入小清河濟南淄川皆被其患後河勢益趨而北鄆州之患始少

此五代及宋鄆州水患也而博平茌平為大河東出之道矣

又東經長清縣北禹城縣南

長清以西古大河所經也碣磳津在焉南北朝時大河皆經此矣大抵東阿以東往往挾濟而流又

東北以達于海也

又東經歷城縣北臨邑縣南

臨邑東有四瀆津大河故道所經唐五行志永徽六年齊州河溢即此地也

又東北經商河縣北武定州南

此昔時大河所經也唐長壽二年河溢棣州又開元十年棣州河決太和二年河決壞棣州城宋祥符四年河決棣州聶家口

在今武定州西南二十里舊州之西南五



年又決于州東南李氏灣六年徙州治而北以避  
河患自是澶滑之間大河屢溢而棣州之流漸絕  
矣

又東經濱州境合清河以入海

水經注河水東逕濕沃津

今蒲臺縣

又東經千乘城北

又東過利城北

利城今博興縣  
縣治為黎城

又東北濟水從西來

注之又東北入于海夫水流變遷其詳不可得而  
知今大清河自蒲臺利津縣東北入海惟小清河

則經青州府博興樂安縣境而後入于海或謂宋

初大河東行大抵從濱州境合于大清河或謂大

清河即東漢以來大河經流之處

水經注有南北二濟無大小清

河之名其所言北濟者大渠與小清河相參錯或大清河即大河故瀆河遷而濟水注其中與夫

自東漢至隋唐水之侵齧漲溢豈能盡免而由平

原千乘間以入海則未經變異也然則治河如王

景其成法詎不足遵與自梁晉夾河之戰苟且目

前橫挑大鑿

梁段凝決河引水以限晉兵謂之護駕水此五代以後潰決之患所由致

也延及宋季橫決無已金元河患皆與國為終始  
水經諸書既未能條貫源流兼綜終始史家紀載  
又往往參差同異茲畧舉往迹為之差次古今之  
變覽者亦可知其梗槩矣

右古大河終

大河今自陽武縣南又東逕開封府城北封邱縣南  
大河今在開封府城北十里宋元符三年河決開  
封之蘇村

舊志云府西三十餘里有蘇村

元至元二十三年河決

開封祥符等郡縣十五處皇慶三年河決開封陳

留等縣延祐七年河決開封縣蘇村及七里寺諸

處泰定二年河溢汴梁三年復壞汴梁樂利隄發

民夫築塞明洪武七年河決開封隄十六年又決

開封東隄自陳橋至陳留

陳橋在府東北一十里

二十年河

復決開封城三十年河溢開封正統十三年河決滎

陽尋自滎澤縣孫家渡決而東南開封遂在河北景

泰中始復

河渠考國初開封城北去大河四十里洪武二十四年河決原武而東經城北

五里至此遂出府南築塞以天順五年河溢決開後大河經城北不過十數里

封府北門弘治三年河決開封南入淮成化十四

年河決開封府西杏祀營在府西二十里神宗十七年河

決府西北劉獸醫等隄十餘處劉獸醫隄在府西北三十五里四

十四年河決開封陶家店張灣陶家店在府西北二十里張家灣在

府西北十五里由護城隄下經陳留等處入亳州渦河是

冬決口淤河復舊道崇禎十五年賊決開封西北

朱家寨在城西北十七里城陷大河自陳潁諸州漫入淮

泗蓋大河出陽武之南開封城外皆為漫淫沮洳  
之場矣而河北之封丘縣南去大河五十里舊  
時大河在縣西北四十餘里金明昌五年河決陽  
武灌封丘而東此封丘陽武在河北之始也元至  
大二年河決封丘順帝至元初河復決于封丘宏  
治一年河決原武其支流決封丘荆隆口在縣西南三十  
餘里漫祥符下曹濮衝張秋五年河復決于荆隆口  
濱儀封之黃陵岡更犯張秋壞會通河尋命劉大

夏治之志云縣東南有陳橋集

在縣東南四十餘里與祥符縣接界

東連馬家口西抵荆隆口為大河衝要神宗十五年河復決于荆隆口長垣東明幾于陷溺堤防切焉自陽武而入封丘河益東南流荆隆口直東則經長垣東明出曹濮直趨大清河矣較之出徐沛合淮泗以入海者道為徑易夫河行之道宜直不宜紆入海之口宜近不宜遠河之兩岸宜濶而歸流宜深

歸流即俗語所謂落槽也

渾水則宜置斗門且多置

之用王景更相迴注之意使不至旁溢河未必不可東也雖然大河東則會通河廢會通河不廢則大河不可得而東兩者不並立矣

又東經陳留縣及蘭陽縣之北河之北岸為長垣縣之境

大河在陳留縣北三十里

河防考大河北岸有陳留塞銅瓦廂為黃河衝

激之處屬陳留界內

又東三十五里至蘭陽縣縣北去大河

十五里

大河舊在縣北三十餘里

志云大河經陳留蘭陽而東



水流湔湔衝激曹鄆嘉靖七年于縣北開趙皮寨  
白河一帶以分殺水勢十三年河決趙皮寨口南  
入淮既而河流遷徙趙皮寨口復塞十九年兵部  
侍郎王以旂于縣東開李景高支河

在縣東北十里

引河

由蕭縣出徐州小浮橋凡六百餘里以濟二洪之

涸

時河決睢州而南也

未幾復淤神宗十七年河決李景高

口入睢陳故道

決河故道也

尋塞之而長垣縣南數里

有河隄舊為大河所經

即宏治中劉大夏所築大行隄也河防考長垣縣南

隄長九十七里而與封邱縣新豐村接  
界隄外有洶北河相傳即黃河故道今縣大河

六十里而遙矣

又東經儀封縣北河之北岸為東明縣界

大河今在儀封縣北二十里元至元二十三年以  
後河屢決汴梁路河出蘭陽儀封之南大德元年

河決杞縣蒲口

儀封西南至杞縣九十五里蒲口在杞縣東北

二年蒲口

復決漂溺歸德屬縣田廬三年復決蒲口歸德郡  
縣皆罹水災明洪武十六年河決開封東隄尋決

杞縣入于巴河宏治二年河決原武分流泛濫于  
儀封考城歸德趨宿州五年河決封丘荊隆口潰  
儀封黃陵岡在縣東  
十里衝張秋而河北之東明西接  
長垣東南舊有長堤為河流所逕今河益引而東  
南東明去河遠矣

又東南逕睢州及考城縣之北又東南逕歸德府北  
河之北岸為曹縣界

大河南至睢州七十里明嘉靖十九年河決睢州

野雞岡

在州北六十餘里其旁決處曰孫繼口

由渦河逕亳州入淮

徐州呂梁百步二洪皆洄尋修塞之又逕考城縣

南去縣三里縣境右為河流之衝也

河防考大河北岸有芝麻

庄陳隆口為縣境隄防要地

又東南逕歸德府北南去府城三

十里自元以前歸德去河遠患頗少元至元二十

三年河衝決河南郡縣歸德始被其患大德二年

河決蒲口三年復決蒲口侵歸德郡縣至大二年

河決歸德是時河南徙歸德常在河北至順以後

河漸決而北歸德仍在河南明洪武二十三年河

決歸德命修塞之自正統以後河決而南歸德又

在河北正德以後則仍在河南其新集口及丁家

道口皆河濱衝要也

新集口在府北三十里補東即丁家道口

嘉靖三

十七年新集河淤河流於是一變四十四年河淤

益甚而運河大受其病未幾河復決新集塞龐家

屯

在府東北

東出飛雲橋神宗二十九年河決蒙城集

東南蕭家口

蒙城集在府東北三十里以故蒙城而名

河復南徙而曹

縣在歸德府西北百里南至大河五十餘里縣為

河流南下之衝一有潰決縣輒當其患金大定八

年河決李固渡

在縣西

水潰曹州城分流于單州之

境

今曹縣故曹州也單縣故單州也自宋時大河北決以後尋復徙而南金史所載河患始見于

此二十九年河復溢于曹州小堤之北元至順元

年河決曹州北魏家道口至正四年河北決白茅

堤

在曹縣西北七十餘里與東明縣接界

又北決金堤

在濮州西南亦曰老堤

五年河復決濟陰

即曹州

九年白茅河東注沛縣遂

成巨浸乃命賈魯治之疏塞並舉河復故道南涯  
于淮又東入于海二十六年河復自州境北徙東  
明曹濮下迄濟寧民皆被害明洪武元年河決曹  
州從雙河口入魚臺正德四年河決曹縣楊家口

在縣西

犇流曹單二縣境東達王子河

故河在單縣東接豐縣境

抵豐沛舟楫通行遂為大河七年始塞之

河臣劉愷築大

隄自縣西北魏家灣東至雙堙集亘八十里趙瓚繼其職復增築三十里曹單始平八年河

復決曹縣嘉靖七年河復決曹縣楊家口二十六

年河決曹縣衝魚臺之谷亭三十七年河復自曹  
縣境東北出衝單縣之東南蓋歸德府北之新集  
淤而河流四溢也自嘉靖以前曹縣河患稱為首  
衝幾與宋之澶鄆同一轍矣 曹縣河患論者謂  
始于金之大定中非也後漢永平中詔書稱河汴  
分流復其舊迹陶邱之北漸就壤墳然則曹州于  
漢世已曾為沮洳之場矣大約濬滑澶濮曹單數  
州縣間大河東出實為要脅之地疏濬無方病必



先見自古及今其得免于墊溺者幾希矣

又東為虞城縣及夏邑縣之北河之北岸為單縣之  
境

大河在虞城縣北三十里又東逕夏邑縣北二十  
二里嘉靖十三年河自蘭陽趙皮寨南決入淮運

河淤二洪洄繼而自夏邑縣太邱白村等集

太邱集在

縣東北三十里接永城縣界又西即回村集

衝激數口轉向東北流經

蕭縣城南出徐州小浮橋濟二洪之洄運道得以

不阻趙皮寨尋塞而單縣南去大河二十餘里去

夏邑縣八十餘里亦河流之衝也嘉靖六年河決

單縣衝入沛縣九年河由單縣侯家村在縣東南決魚

臺塌場口衝谷亭決而東北也塌場口在魚臺縣南四十里神宗二十

一年河決單縣西南黃堍口近虞城縣界一出徐州小

浮橋一出舊河達鎮口閘舊河沛縣南舊運河也鎮口閘在徐州之茶城

二十五年河復大決于黃堍口二十九年河決單

縣之蒙牆寺三十年河復決單縣之蘇庄在縣東南沖

魚臺豐沛明年復決蘇庄衝入沛縣太行堤

在縣西北

灌昭陽湖入夏鎮橫衝運道于是泲河之議起蓋

河患之劇曹單其最矣

又東為碭山縣之北又東流經豐縣之南

大河在碭山縣北二十里為豐沛上游

縣西北有堅城集為

單縣接境之處舊築斜壩于其東以防墊溢又西劉霄等口亦為河流衝要

志云大河

舊經縣南三十里嘉靖三十八年河流北徙始出

縣北又東經豐縣南二十里又東入蕭縣界

又東逕沛縣之南蕭縣之北

大河在沛縣南五十餘里此隆萬間河流也初大河自豐碭間經蕭縣沛去河遠雖有衝決之虞而非經流之所也正德四年河決曹縣直達豐沛既又決城南飛雲橋入運河嘉靖二年河決沛縣六年河自曹單境衝縣東北雞鳴臺七年河決而南縣北廟道口在縣西北三十里淤三十餘里八年飛雲橋之水北徙魚臺縣之谷亭舟行間面九年沛縣北

境之水決魚臺塌塲口衝谷亭水經三年不去十  
三年廟道口復淤三十七年歸德新集口淤大河  
散溢支流衝入飛雲橋四十四年大河淤塞自蕭  
縣趙家園泛溢而北至曹縣南棠林集復分二股

南股遶沛縣戚山

在縣西南三十里

楊家集

亦在縣西南

入秦

溝

在徐州東北三十里

至徐北股遶豐縣華山

在縣東南三十八里

由

山東其村集漫入秦溝接大小溜溝

大溜溝在徐州北五十里

亦曰南溜溝小溜溝在州北六十里亦曰北溜溝

溢入運河至徐其北股

又自華山而東北分為一大股出飛雲橋散為十

二股縱橫以入漕河至湖陵城

口在沛縣北五十里

又逾

河漫入昭陽湖從沙河灌二洪浩渺無際而河變

極矣明年河復決沛縣南二三等鋪衝入運河亦

由湖陵城口入湖陂是時河臣朱衡潘季馴方改

濬新河既而縣東馬家橋堤成

馬家橋在沛縣東南四十里

障

水南趨橫流復定而蕭縣在大河南五十里亦隆

萬間河流也舊時大河自縣西六十里之趙家園

經翼門集

在今縣北  
西十三里

出徐州之小浮橋皆安流無

恙嘉靖三十七年大河北徙其後東西靡定一變

為溜溝再變為濁河

濁河在徐州西  
北二十餘里

又變為秦溝

嘉靖末大抵自縣西北崔家口右城集雁門集北

陳溝梁樓溝胡澱溝東下小浮橋逕行陸地水深

或僅一二尺比之故道高三尺有餘停阻泛濫蕭

縣境內一望瀰漫城內城外皆為澤國隆慶四年

決溢崔家口五年河臣潘季馴上言大河原自新

集口經虞城夏邑之北碭山之南至蕭縣冀門出  
小浮橋其後河流遷徙行水之處俱係民間住址  
陸地水不能刷衝不成槽雖一望茫然而深不及  
尺且大勢盡趨濁河出小浮橋者不過十之一二  
決裂之患正恐不免日者臣由夏鎮歷豐沛至崔  
家口復自崔家口歷河南至新集口則見黃河大  
勢已直趨潘家口鄉老言去此十二三里自丁家  
道口以下二百二十餘里舊河形跡見在可開臣



即自潘家口歷丁家道口馬牧集韓家道口司家  
道口牛黃垸趙家園至蕭縣一帶皆有河形中間  
淤平者四分之一河底俱係漫沙見水即可衝刷  
莫若修而復之河之復其利有五從潘家口小浮  
橋則新集迤東河道俱為平陸曹單豐沛永無昏  
墊一利也河身深廣受水必多每歲可免汎溢之  
患虞夏豐沛之民皆得安居二利也河從南行去  
會通河甚遠間渠無虞三利也來流既深建瓴之

勢導滌自易則徐州以下河身亦必因而深刷四  
利也小浮橋來流既遠則秦溝可免復衝茶城永  
無淤塞五利也報可既而李馴以言去遂中止神  
宗五年河衝蕭縣三十二年河臣李化龍言河自  
開封歸德而下合運入海其路有三由蘭陽出茶  
城徐邳名濁河為中路由曹單豐沛出飛雲橋秦  
溝名銀河為北路由潘家口入宿遷出小河口名  
符離河為南路南路近陵北路近運惟中路既遠

于陵亦濟于運前興濬未竣今自堅城以至鎮口  
河形宛然宜仍舊開濬從之三十四年河工成自  
碭山朱旺口至小浮橋袤百七十里河歸故道自  
是蕭縣去大河十五里而近而沛縣去河益遠  
又東經徐州之北又東南經靈璧縣之北

大河在徐州城東北今為漕黃交會之衝咽喉重  
地也嘉靖八年河決州北大溜溝三十二年河決  
州東南之房村

在州東南  
五十里

旋塞之四十四年河由

秦溝衝茶城運道大阻神宗元年河決房村三十

三年河決州北境之蘇家庄淹豐沛黃水逆流灌

濟寧魚臺單縣而魚臺尤甚于是呂梁河溢明年

復故三十九年河決狼矢溝在州東二十里塞之明年又

決三山在州東南二十里灌睢寧諸處出白洋小河復合

正河尋塞之四十四年復決狼矢溝由蛤蟆周柳

等湖蛤湖蠔湖與周湖柳湖俱在邳州西北入沭河出直口直河復口也

與黃會既而復故天啟三年河決徐州青田大龍

口尋塞之四年黃水大漲灌州城乃遷州治于雲

龍山而靈壁縣亦大河所經也

大河在縣東北五十餘里隆慶

四年河決縣西北之雙溝神宗十七年河又決雙

溝單家口四十二年河決靈壁縣之陳鋪決口旋

淤河流復故天啟元年河決雙溝黃鋪水由永姬

湖

在睢寧縣境

出白小河口仍與黃會

白洋河在宿遷縣故道

湮涸復築塞之

又東南經睢寧縣北邳州城南

大河在睢寧縣西北五十里隆慶四年河決睢寧

之曲頭集

曲頭集王家口馬家淺新安集一帶皆縣北境之要口

築塞之而

邳州尤大河之襟要也

大河在州城南二里

城北有沂河從

山東沂州界南流逕城下分東西流南入大河又

州西北有沭河亦自山東嶧縣界流入境會沂水

入于河隆慶六年邳州河決神宗二年河決邳州

三年邳州河溢

是時河決崔鎮逆灌邳徐既而潘季馴濬塞之河復舊道十七年李

馴于河南岸睢寧界上築洋山至土山橫堤以防橫溢河安流三十二年沭河成而黃運分為兩途

矣

又東逕宿遷縣南又東逕桃源縣北

大河在宿遷縣南十里東流為小河口睢水入大河之道也又東逕桃源縣城北西北四十里曰雀鎮口隆慶五年河決運河淺阻神宗六年河臣潘季馴始修塞之神宗二十六年于縣境開新河分導黃河入海既而復塞

又東南經清河縣南而淮河來合焉

大河在清河縣治南一里淮水自西南來合焉縣  
當淮黃交會之衝形勢特重志云黃河經流即泗  
水舊道也泗水亦名南清河縣因以名縣西三十里有三汊河  
口泗水至此分為大小二清河大清河逕縣治東  
北入淮俗謠為老黃河今湮其小清河在縣治西  
南入淮即今之清口也

又東逕淮安府城北又東經安東縣南而入于海

河淮合流經淮安府城北五里永樂十四年平江



伯陳瑄經理漕渠于北河南岸

淮人謂黃河為北河淮河為南河亦

日外河而漕河為裏河

築堤四十餘里隆慶三年河溢自清

河抵淮安城西淤三十餘里決方新二壩

二壩在府城西

北三十里清江浦隄之東

出海平地水深尺餘四年淮決高堰

河決崔鎮

源在桃縣

橫流四溢連年不治神宗六年河

臣潘季馴培高堰以障淮水之東塞崔鎮以防大

河之北而黃淮復合是時亦增築清江浦新城及

鉢池山柳浦灣迤東堤岸稱為完固十四年河決

范家口

在府城東北

水灌淮城全河幾奪又決天妃壩

即清江浦口舊壩也

淤福興等閘尋塞治之二十三年河淮

決溢邳泗高寶諸處皆患水災按臣牛應元言治河在闢清口浮沙次疏草灣下流達伍港灌口廣其渡入海治淮在開周家橋達芒稻河入江河臣楊一魁亦議先分黃次導淮分黃則開黃家嘴新河分洩黃水導淮則闢清河積沙數十里又于高堰旁若周家橋武家墩稍引淮支流分入江海水

患稍息天啟元年河決王公堤

堤在清江浦北岸逼隣大河志云自

淮安西門外抵清江浦約三十里內外二河僅隔一堤相距不過尋丈王公堤勢最危急二瀆南徙衝

刷日甚捲埽堤壩不可不密也河渠攷天啟元年淮安淫雨連旬黃淮暴漲水灌淮安城小民蟻城

垣而居郡守宋統殷等力塞王公堤患始殺焉三年復決磨盤庄  
在城西二十餘

里蓋淮郡為漕淮黃綰轂之口也而安東城在黃

淮北岸海口漸近上流無壅水自奔趨以赴海矣

右今大河

地志大河之流自漢至今流移變異不可勝紀然

孟津以上則禹跡宛然以海為壑則千古不易也  
由孟津而東由北東以趨于海則澶滑其必出之  
途由南道以趨于海則曹單其必經之地衝澶滑  
必由陽武之北而出汲縣胙城之間衝曹單必由  
陽武之南而出封邱蘭陽之下此河變之託始也  
由澶鄆而極之或出大名歷邢冀道滄瀛以入海  
或歷濮范趨博濟由濱棣以入海由曹單而極之  
或溢鉅野浮濟鄆

謂濟寧  
東平

挾汶濟以入海或經豐

沛出徐邳奪淮泗以入海此其究竟也要以北不出漳衛南不出長淮中間數百里皆縱橫糜爛之區矣又自古大河深通獨為一瀆今九河故道既湮滅難知即歷代經流亦填淤莫據太抵決而北則掩漳衛決而東則侵清濟決而南則陵淮泗昔人謂河不兩行余謂自漢以來河殆未嘗獨行矣

胡氏渭曰河一過大伾而東不決則已決則東南注

于淮其勢甚易丘文莊以宋熙寧十年河決為入淮之始非也先是天禧三年河決滑州歷澶濮曹鄆注梁山灤合清水古汴渠東入于淮矣又先是咸平三年河決鄆州浮鉅野入淮泗矣又先是太平興國八年河大決滑州泛澶濮曹濟東南流至彭城入于淮矣溯而上之則漢元光三年河決濮陽瓠子東南注鉅野通于淮泗矣但皆未幾即塞其歷久而不變至今五百餘歲河淮并為一瀆則自金明昌五年始

蕙田案此言淮河合瀆之始

又曰元末河復北徙自東明曹濮下及濟寧而運道壞明洪武初命徐達自曹州東引河至魚臺入泗以通運永樂九年又命宋禮自曹疏河經濮州東北入會通河是北流猶未絕也迨遷都之後仰給於會通者重始畏河之北北即塞之宏治中兩決金龍口直衝張秋議者為漕計遂築斷黃陵岡支渠而北流於是永絕始以清口一綫受萬里長河之水陽武以下

河之所經繕完故隄增卑倍薄但期不害於漕而漢  
之下策轉為明之上策矣至於黃淮既合則唯以堰  
閘為務堰者高家堰家一作加閘者淮南諸湖閘口也堰  
閘以時修固則淮不南分助河衝刷黃沙使海口無  
壅潘氏季馴論治河之要曰河之性宜合不宜分宜  
急不宜緩合則流急急則蕩滌而河深分則流緩緩  
則停滯而沙淤此以隄束水借水攻沙為以水治水  
之良法也又曰通漕於河則治河即以治漕會河於



淮則治淮即以治河合河淮而同入於海則治河淮

即以治海

自漢以來治河者莫不以分水為長策唯張戎之論不然潘公深得其意觀其

所言若無赫赫之功然百餘年來治河之善卒未有如潘公者蓋會通必不可廢則河唯宜注淮以入海雖有賈魯之才智亦無所施故邵文莊有治之以不治乃所以深治之之說古語云守病不治常得中醫此之謂也

地志自古及今治河之說亦紛如矣然終未有奇策

秘計也其稍異者亦曰移河而北載之高地耳夫宋人回河而東為千古之誚今遽欲回河而北不復蹈前轍乎或曰別穿漕渠無藉于河河必無如我何夫漕渠縱無藉于河河可任其橫決乎淮濟諸州之民何罪而盡委之谿壑乎且自禹貢以至于今大河常為轉輸之道置河而言漕不猶因咽而廢食乎或曰棄地以畀河使遂其游蕩夫九州之內莫大於海乃舍其歸宿之地而于都邑間井間別求一貯水之壑

此更不通之論也然則治河者將如何曰人事修舉而已矣所謂人事者疏也濬也隄也塞也無不可用也上流利用疏暴漲利用疏漢桓譚新論曰河水濁一石水六斗泥而民僅引河溉田令河不通利至三月桃花水至則決以其噎不利也可禁民勿復引河此即後人河不兩行之左証也賈讓以多開水門為中策而說者非之似矣然今榆林寧夏以西皆引河灌溉有沃饒之利誠上流多為支分稍殺其悍激之

勢未必非利也至漫漶四出之日濬塞之功茫然莫措于是多為支派平其泛濫而後隨宜致功軌之于正疏可偏廢乎歸流宜用濬農隙水涸時宜用濬河出險就平中土夷曠孟軻而東曾無崇山巨陵為之防重陂大澤為之節惟恃河身深濶庶幾順流無阻安可不察其堙障急為蕩滌又北方土阜水流迅直霜降水涸往往曾不容舫及伏秋淫潦百川灌輸湏洞之勢一瀉千里使不于淺涸無事時預為經理使

深廣如一忽然犇潰而後圖之其有濟乎河流散漫  
宜用堤地勢卑薄宜用堤蓋河流易遷任其浸淫無  
以約之則變且不測隄以束之使順隄直趨無從旁  
溢所謂因其勢而為之防非逆其流而為之障也若  
其沙土疏薄形勢卑窪則必當規其遠近隨其夷險  
多方以制其侵嚙禦其犇衝若以勞費為虞是厝火  
于積薪之下也故道當因則新口宜塞正流欲利則  
旁支宜塞歐陽子謂故道不可復亦謂故道之湮滅

難返者耳若源流未改而忽以一時之衝溢遂棄舊  
道予不問將隨其決裂何所底止又水之橫潰多在上  
流惟下流淤然後上流潰亦必上流緩然後下流  
淤此上流謂近海口之上流近海之處正當厚其力而逆其勢不  
當多為之途以弱其力也如草灣河新黃河之類非治河勝策也所謂  
塞亦可用者非乎要以與時變通因端順應本之以  
已饑已溺之心揆之于行所無事之智河未必終于  
不可治也夫

蕙田案以上兩條論治河之要

胡氏渭曰天官書曰中國山川東北流其維首在隴

蜀尾沒於勃碣

漢書天文志云勃海碣石

一行言山河兩戒以河

濟為北紀江淮為南紀由此觀之禹河從勃碣入海

上應天文下協地理漢武帝所謂聖人作事為萬世

功通於神明恐難改更者也殷本紀載湯誥之言曰

東為江北為濟西為河南為淮四瀆已修萬民乃有

居四瀆之由來尚矣爾雅江河淮濟為四瀆四瀆者

發源注海者也劉熙釋名曰瀆獨也各獨出其所而入海也自王莽時河徙從千乘入海而北去碣石遠矣然猶未離乎勃海也自金明昌中河徙而河半不入勃海矣元至正中又徙而河全不入勃海矣河南之濟久枯河或行其故道今又與淮渾濤而入海淮不得擅瀆之名四瀆亡其二矣世習為固然恬不知怪愚嘗為杞人之憂萬一清口不利海口愈塞加之以淫潦而河淮上流一時並決挾阜陵洪澤諸湖衝



蕩高堰人力倉卒不能支勢必決入山鹽高寶諸湖而淮南海口沙壅更甚於曩時怒不得泄則又必奪邗溝之路直趨瓜洲南注于江至通州入海四瀆并為一瀆拂天地之經奸南北之紀可不懼與欲絕此患莫如復禹舊迹然河之南徙日以遠矣濬滑汲胙之間無河新鄉獲嘉亦無河矣賈讓李垂之策將安所用之或曰金溫陞可喜請於新鄉縣西決河水使東北合清河至清州柳口入海其說不可行乎曰今

新鄉流絕欲自武陟之東濬其故道約一百三四十里更於新鄉縣西決河使東北流鑿生地五十里勞費不訾民何以堪且滎陽以下每決必潰右隄未聞有決左隄而北者疑此地北高南下新鄉縣西之故道去清河雖近未必能導之使北也

蕙田案此言河不可使北

又案為淮揚籌水患者皆言挽河北行使淮自淮而河自河則無潰決之患不知自周至

金河未嘗與淮合而河患不已則河之善決  
豈待與淮合而後其勢始暴哉今竟移河北  
去淮離河則淮害息而河之為害於他處必  
有如前代者其費水衡之錢貽赤子之患如  
故耳況今日之河必不可遷之使北者以其  
為運道所關也國家數百萬漕糧豈可一悞  
倘引河入海必穿運河而東河一入運則運  
道必廢其利害有什百于河決者豈可輕議

汎河之故道自禹至金其迹有五將盡舍不用而別開一道耶抑即就此五道之中擇而復之耶復禹時故道則必開武陟原武獲嘉陽武新鄉之地使成河而後引河入衛衛河即清水禹時清但入河在今日則必由衛河以達漳河矣由衛入漳東由天津入海矣復周時故道則自衛輝以東必更開濬滑開州之地使成河鑿宋商胡故道過大名入衛河以北矣復漢時故道則自開州

以東必更開清豐觀城范縣東阿平原德州

之地使成河引河至蒲臺利津以入海矣

宋與

周二路相去不遠故不另出復金時北流故道則必開新

鄉胙城長垣曹鄆壽張之地使成河引河至

東平入大清河以入海矣掘地則數千百里


歷州郡以數十計無論人力必不能勝即使

能勝能保河之必如人意驅之即行行之無

變乎即衛河漳河大清河皆今日之巨川也

問其身之寬深隄岸之堅固能容全河之水而不虞其汎濫乎此大禹值此亦不敢毅然為之而略無所顧慮也禹之治河也自積石龍門以至泇水大陸必當時河形本屬如是禹特因而疏浚利導之必非河欲東而挽之使西河既南而過之使北也河之南徙已非一日又安能另尋一路使之安流順軌而北去哉

右禹貢隨山濬川



五禮通考卷二百五